

ASO GAFUA, 24 IUNI 2019

Na nofoia e le Fofoga Fetalai le Nofoa i le itula e 9:11 i le taeao.

Tatalo.

FOFOGA FETALAI: Ou te faasila sila atu ua toe amatalia nei Taualumaga ma Galuega a le Fono Aoao Faitulafono.

TUUINA ATU O PEPA

Na tolaulauina e le Failautusi Pepa ua faataatia i luga o le Laulau a Fono, e tusa ai ma T.T.49(2).

1. P.P.2019/2020 Nu.85, Lipoti o Galuega a le Ofisa Suetusi a Samoa mo le vaitaimi Iulai 2017 ó Iuni 2018.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2018/2019 & TULAFONO TAU FAAOFI O LE
FAATATAUINA O TUPE 2019/2020
– felafolafoaiga i luga o le faiatuga faalua - Aso 5**

FOFOGA FETALAI: E faaauau Galuega le Fono Aoao i le aso fono talu ai ua maea ona talifua itau le Afioa i le Minisita mo Aoga, Taaloga ma Aganuu e tusa ai ma mataupu sa laga i saunoaga a Sui usufono mamalu.

Ia o le avanoa lenei mo le Minisita o Tupe e saunoa e talifua itau i mataupu ma mea sa laga e sui usufono. Ou te tapa ma le faaaloalo lau Afioa i le Minisita o Tupe.

Afioa Hon SILI EPA TUIOTI (Minisita o Tupe): Faafetai atu i lau Afioa i le Fofoga Fetalai ma sui usufono mamalu o le Palemene. E muamua lava ona momoli le faafetai i le Atua i Lona Alofa ma Lona Agalelei ua faafouina ai le malosi e faaauau ai la tatou Fonotaga i lenei vaiaso. Lau Afioa i le Fofoga Fetalai, ou te talitonu ua malamalamaga ma manino sui usufono mamalu uma o le Palemene le faamalamalamaga a le Afioa i le Palemia, faapea foi le Taitaifono o le Komiti o Tupe i le vaiaso talu ai, i faiga faavae ma taiala na tapena ai le Tala Faatatau Autu o Tupe 2019/2020 ma o le a ou le toe oo i ai, se i vagana nisi o faamatalaga faaopoopo ina ia faamalamalamaga atili ai nisi o vaega o le Tala Autu o le Tupe.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Ae muamua lau Afioga e momoli atu le faafetai tele i Ofisa Sili o Pulega o Matagaluega ma Faalapotopotoga Tumaoti a le Malo, i lo outou sao taua i le tapenaina ma le tuufaatasia o le Tala Faatatau Autu o le Tupe 2019/2020. E momoli atu le faafetai i lo outou lagolago foi i le taitaiga a le Ofisa Sili o Pulega o le Matagaluega o Tupe ma i latou o le Ofisa o Tupe sa faigaluega i le isi ono masina lea talu ai i le faasologa o le tapenaina o lenei Tala o le Tupe.

Lau Afioga i le Fofoga Fetalai, e tele lava taimi ou te asiasi atu ai i fonotaga a le faletupe o le atinae o Asia, o le faletupe ma faalapotopotoga o lo o lagolagoina le faatupeina o lo tatou tamaoaiga ma tatou atinae tetele, faapena foi le tele o missions lea e aumai i Faalapotopotoga ia e asiasi mai le tatou atunu ina ia faapena ona talanoaina ma le Malo ma aufaigaluega a le Malo i galuega tetele ua ave i ai le faamuamua a le Malo.

O le molimau o lo o masani ona talanoa mai ai latou ia te au, o le tulaga lea i le maoae ma le mauluga o le tomai ma le commitment o a tatou Matagaluega, aemaise lava i latou o Ofisa Sili o Pulega o lo o fai ma faatalanoaina le faatupeina o nisi o tatou galuega tele o lo o ave i ai le faamuamua. O le latou lava mau, a fua i totonu o le Vasa Pasefika, e sili atu le tulaga o le tomai ma le agavaa ua i ai tatou Ofisa Sili o Pulega o tatou Matagaluega ma Faalapotopotoga Tumaoti. O le tulaga lea e mitamita ai ma toe momoli atu ai le faafetai tele ma le faamalo ia outou i lo outou lagolago mai. O le mea taua lava i fonotaga nei aua e masani foi ona ou saofai ai pe a omai i latou i inei pe o foi i fafo, o le tulaga lea e le na o le faalogologo o tatou. O le tulaga sili ona taua o le fai mai o latou ma fautua mai latou, ae faapena foi ona tali atu le aufaigaluega a le Malo ina ia mautinoa, o a ni faaiuga e fai ma ni tulaga e fesoasoani e tatau ona talafeagai ma le tulaga o lo o i ai le tatou tamaoaiga, ia o faatasi ma le tulaga o tatou atinae ua ave i ai le faamuamua a le Malo.

O le mea taua lava ua ou matauina, o le naunau lea e contextualized fesoasoani ma faiga faavae ma tiala o lo o aumai e latou ina ia talafeagai ma le soifua manuia o le tatou tamaoaiga o lo o i ai i lenei vaitaimi, faatasi ai ma tatou fuafuaga alumamao. O le tulaga lea, ou te talitonu e tatau lava ona faaleo atu ona o le tele o le suiga o le tatou public service i galuega i le tapenaina ina ia mautinoa fesoasoani o lo o aumai e talafeagai tonu lava ma atinae o lo o ave i ai le faamuamua.

Lau Afioga o le tualga i le tamaoaiga e tautino atu lava o lo o sologa lelei. E pei foi ona silafia le mauluga o le tulaga o lo o i ai le faatupulaia o le tatou tamaoaiga i le tausaga talu ai ma le tausaga nei, o lo o faapena ona agai i luma. O le faatupeina o le tele lava o lo o faatupe mai a tatou lava tupe maua mai i totonu o Samoa faatasi ai ma tatou tupe o lo o maua mai tatou paaga i fafo e le gata i Malo e pei o Ausetalia, Niu Sila ma Iapani ma Saina o lo o fesoasoani mai, ae faapena foi i Faalapotopotoga tau Faletupe a le Lalolagi ma Asia o lo o mafai ona fesoasoani mai i le atinae o tatou faletupe tetele.

O le tulaga foi i le aofai o le tatou aitalafu, debt i le faaiuga o Mati 2019, tusa e \$1.04piliona, e tusa lea o le 49.2% o le GDP. E pei ona silafia o lo o faapea lava ona faagasolo agai i lalo le vaega lea o le total debt e fua i le tatou GDP.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O le tatou GDP i le faaiuga o Mati 2019, e \$2.2piliona. O le debt service ratio po o le vaega lea e faatupe mai le totogiina atoa lava o le aitalafu i tausaga taitasi, le tausaga lenei, e tusa e \$73.5miliona. A fua la i a tatou lava tupe o lo o aoina i totonus o le atunuus e \$646miliona, o lona uiga e na o le 11% o tatou tupe ia e ao lava e tatou i totonus o le atunuus o lo o faaalu i le totogiina o tatou aitalafu. Ou te talitonu o se tulaga o le a faapea ona faaaauau pea. Atonu o lo o i ai foi se popole i le tulaga faapea i te i ua tatou silasila vave e faatupulaia tatou aitalafu i faalapotopotoga i fafo po o ni Malo, ae mo le silafia e lau Afioga, o lo o gafatia e tatou le tulaga o le toe faatupeina, a o le mea taua lava, e ala ona tatou nono mai tupe ona o le tatou manaomia ina ia faatupulaia le tatou tamaoaiga, e ala lea i le faatupeina o galuega tetele faapea foi vaega o lo o mafai ona tatou faia i lenei taimi, aua o le mea mautinoa lava a tatou le faia i le taimi lenei, o le isi 15 po o le 20 tausaga, masalo ua faaselauina pasene le taugata o le a oo i ai nei galuega tetele.

O a tatou foreign reserves o lo o i ai nei i le masina o Mati, e tusa lena ma le \$465.4miliona tusa lea o le 6.4masina e mafai ai ona faatupe tatou oloa e auina mai fafo.

I le lipoti a le IMF pei ona silafia ua taua foi i le lauga, o lo o faaaauau pea lava tulaga i le asiiasi mai o le IMF e asiiasi mai e fai talanoaga ma le Malo ia Mati i tausaga uma. Ma e pei foi ona taua i le lauga o le Tala o le Tupe, e taua tele fesootaiga nei, ina ia mafai ona omai latou galulue faatasi ma Ofisa Sili o Pulega ina ia faapena ona femalamalamaaai i le tulaga o lo o i ai le tamaoaiga, ma le talitonuga foi o tatou ia, o lo o sologa lelei le tatou tamaoaiga. O lo o i ai le manatu o le medium term ua tatau ona pau le tatou debt to GDP i le \$45.5miliona. Ae pei ona ou taua i le faaiuga o Mati o le tausaga nei, o lea ua 49.2% o le GDP. O lo o lava le space e mafai ai ona tatou nono mai nisi vaegatupe e tusa ai o ni galuega taua ina ia mafai ai ona fesoasoani i lo tatou tamaoaiga. E pei foi ona silafia na faalauiloa i le lauga o le tala o le Tupe le tatou taiala lea i le 2040, o le taumafaiga atoa lava o lena taiala, o le tulaga lea e tatau ona tatou vaai mamao. E moni lava o lo o i ai le tatou SDS e tai fa tausaga ma fai, a ua i ai le manatu, e tatau ona tatou vaai mamao atu agai i luma. E le faapea o le a aveese ai le tatou SDS, o le a faaaoga pea le SDS i le tai tolui fa tausaga ia taumafai ai ia faamautinoa o lo o tatou galulue ina ia ausia matatia ia po o miti ia tatou te fuafua i le 2040.

Lau Afioga i le Fofoga Fetalai, e le gata o lea ua tapena, ae ua faapea foi ona amata faatalanoa a tatou paaga mai fafo i le fesoasoani mai i le faatupeina o tatou atinae, le fesoasoani mai i le faatulagaina o leí

FOFOGA FETALAI: Malie lau Afioga i le Minisita o Tupe se i tulai mai le sui usufono mo Salega Sasae.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Tofa Olo Fiti Afoa Vaai (Salega Sasae): Lau Afioga i le Fofoga Fetalai na o sina mea lava leaí Faafetai atu i lau Afioga i le Minisita ua manino mai nisi o vaega sa taua i se matou faamatalaga i mea lava ia o aitalafu. Ae na ona ou faafesili atu ona o le tulaga o faamaumauga ia sa tuuina atu i le IMF e o lo o outou galulue faatasi, e i ai si eseesege o faamaumauga o lo o tuuina mai i totonus o le Palestene i le Tala o le Tupe lenei, ese foi faamaumauga lea sa tuuina atu i le IMF mo le latou silafia e oo mai ia Mati i le aso 29 o le masina na tea nei.

Lau Afioga i le Fofoga Fetalai o lea ou te tilotilo atu i aitalafu nei, e faasolo agai i luga le tilotilo a le IMF. Na o le 2019/2020 o lea na tau pau mai ai i lalo, ona toe oso loa lea i luga o le aitalafu i tausaga ia e totoe i le lumanaí atu e alu lava tau i luga i le 50+pasene ae eseese la ma faamaumauga lea na aumai i totonus o le Palestene le fiscal strategy lea na aumai o le tatou tamaoaiga, e agai i lalo aitalafu, pau la lena o le mea lea ou te fia malamalama ai po o le a le mea ua eseese ai la outou silasila ese le silasila a le IMF.

E pei o le fesili atu lena lau Afioga i le Minisita. Ma le agaga faaaloalo.

FOFOGA FETALAI: Tulai mai lau Afioga i le Minisita.

Afioga Hon SILI EPA TUIOTI: Lau Afioga i le Fofoga Fetalai, o le tulaga latou i le feeseseseaiga o fuainumera, o lo o fai ma update tatou i le Central Bank, faapea foi le Ofisa o Tupe i a tatou lava faamaumauga o i ai. O le eseesege foi e le o tele, o le mea taua lea ua i ai nei lea ua faaali mai i le faaiguia o Mati, ua pau le tatou debt to GDP o lea ua \$49.2milliona. E pei ona taua o le fautuaga a le IMF i le medium term, a ou faaupuina le medium term, o le 10 minimum, 10 tausaga o i luma ua tatau ona pau atu i le 45.5%. O lou talitonuga lau Afioga, ona o au o lo o mafuta tele ma Faalapotopotoga nei ma talanoa foi i ai pe a oo atu i Uosigitone ma tulaga faapena, ia o le tulaga lava latou ia i le IMF o le tulaga foi lea e very conservative. Ae a tatou talitonu lava tatou ia e mafai ona tatou faia, e mafai ona tatou taofiofi, a manaomia tatou te aitalafu ona o ni atinae taua e fesoasoani ai ina ia faapena ona siitia le tamaoaiga, maua galuega tetele e faagaoioi ai le economy, o le matou talitonuga, e leai se mea o le a tatou taofia ai le tatou aitalafu.

E pei foi ona silafia, o le maualuga o aitalafu lea na i ai ua ova atu i le 50 ua oo atu i le 57 po o le 58, o le taimi tonu lava lea na i ai tatou afa ma Tsunami ma tulaga faapena, a o le i tupu foi le mea lena, sa i ai foi le global financial crisis lea sa i ai nei, o lea la ua tatou faasolo i ai, ona o lea foi ua tatou popoto tatou e mataitu ma fuafua a tatou galuega ma le tamaoaiga ina ia faapea ona oo i se tulaga lelei.

O le fautuaga i le sui usufono, se i onosai, o lea e faasolosolo. O le talitonuga lava latou ia, o lea ua ia i tatou le tomai i a tatou faiga faavae tapena lelei, o tatou fuafuaga tai fa tausaga ma le tatou fuafuaga lea ua vaai mamao i ai, o mea uma lava ia o le tapenaga ina ia oo atu i le tausaga e 2040 ua mafai ona oo atu le tatou... double le tatou employment, le tulaga o le siitia o le tatou tamaoaiga, ma le tulaga o le manuia o le tatou atunu.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E pei foi ona faafofoga i ai i le Lauga o le Tala o le Tupe i nisi o fuafuaga o lo o faia nei, aemaise o le tulaga lea tau aoaoga, lea na taua faapea, e moni lava o lo o i ai le tatou Iunivesite, ae tatau ona toe tagai i ai le Malo e fai se faiga ina ia mafai ai ona fesoasoani atu i le fanau ma o latou aiga ua popoto ma maualuga togi, ae ua vaivai le tamaoaiga ua le mafai ona totogi pili. O le matou vaai i ai, ua tatau ona tatou see atu i se isi tulaga e mafai ai ona tatou... ia maua avanoa uma o i latou nei, ia aua ne i na o i latou e at least afford le o i private schools, a ia faapena ona maua se avanoa o tatou fanau ina ia agai i luma ma o i le Iunivesite, maua faailoga lelei, maua tomai lelei, o le a faapena foi ona lava tapenaina i latou ina ia fesoasoani i ai i tulaga o le faatinoina o galuega a le Malo, alu i luga o le atinae ma faapena ona faamanuia i o latou aiga.

E faapena foi i le tulaga tau le soifua maloloina, o le taimi nei o lo o galulue faatasi le Malo ma le Faletupe o le Lalolagi i se vaega i le mea lava lea o le tau faaitiitia o NCDs. O le latou mau, o lo o tele lava se avanoa e tatau ai ona tatou toe tilotilo e sii i luga le tiute o mea ia e tele ai le suka, tulaga o le gao ma mea faapena. Aua a faapea tatou te le faia, o o lona uiga e oo atu i le 2040 ua toatele i latou e mamai. E pei ona silafia le taugata foi o le faatupeina o le tatou Dialysis Unit, e le se togafitiga foi e faapea e uma ona toe malosi lea...

FOFOGA FETALAI: Malie le Minisita se i tulai mai le Palemia.

Susuga Hon Tuilaepa Auelua Fatialofa Luplesolai Lolofietele Neioti Aiono Galumalemana Dr. Sailele Malielegaoi: Lau Afiofa i le Fofoga Fetalai, na o si... A o le i alu ese le Minisita, o le matapu lea sa laga.

Na ona ou faamanatu atu, o tatou faatoa ulufale, faatoa avea ma sui o le IMF i le tausaga e 1971, ua 48 tausaga talu ai, ae faatoa avea tatou ma sui o le Faletupe o le lalolagi i le 1973. O faiga la a faalapotopotoga nei o le lalolagi ma mea tau tupe, e auina mai a latou savali, e tai tausaga ona omai lea o latou savali o mea o consultative missions, e omai la e feiloi ma tatou e faatalanoa le tulaga ua i ai lea atinae ma lea atinae ma le tulaga tau tupe o tala i tatou fefaatauaiga, ma le lipoti o tatou aitalafu ua totogi. E masani la a omai savali nei, e matua fai a fonotaga, sa fai i le Tusitala le isi fonotaga, na fai i tua i le faetalimalo foi lea o le Hideaway. Manatua le isi fonotaga sa fai i le ta o le 2 i le afiafi ae tuua i le ta o le 7 i le po, ma momoe ai lava matou i tua, officials a le Malo, le Matagaluega o Tupe.

O le agaga lau Afiofa i le Fofoga Fetalai, a omai le IMF ma le World Bank, e omai fesili, ona fesili lea i inei, se faamolemole o le a le tulaga ua i ai le mea lea. E feoai foi talanoa i faletupe, faatalatalanoa i tagata faipisini ona faavae ai lea o le latou lipoti, tasi le tausaga e ese la le savali mai... sau le savali a le IMF, omai ma le World Bank, ae ese foi le savali mai a le ADB latou. Ua sau sau mea nei esese, ua fai ma faalavelave i o tatou tagata ona e tele le taimi o le aufaigaluega e alu ai, aemaise i latou ia o i le faatumutumuga o le Ofisa o Tupe.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Ona alu alu foi lea, faapena foi ma le Minisita, ona fai loa lea o le feiloaiga ma ave foi le tatou fautuaga, a outou omai, ua sili ia ona outou omai faatasi, tasi le mission ae aofia ai outou uma, na i lo le omai eseese e tele ai le taimi aluvale o le Matagaluega, aemaise o lea e faafeagai tatou ma fonotaga. Ou te manatua le isi tausaga na omai ai Saina faatalanoa, e taua le background lea, faatalanoa mea o fesoasoani ia, manatua foi na fai fonotaga a Saina ma taitai o Malo ia e valu lea e i ai le latou sootaga faapitoa ma Saina, ia sa fai ai foi la ma sui o Niu Sila ma Ausetalia, fai le latou fonotaga e tai fa tausaga, o isi taimi e tai lima. Ona omai loa lea tau mai le vaegatupe o le a avanoa mo atunu nei e valu, lea foi o le a usuia mai le fono i Samoa nei i se taimi o le faaiuga o le tausaga lenei mo le isi foi fa tausaga o lumanai e talanoa ai la mataupu ia o fesoasoani, lea la e faatalanoa nei o le vaega mulimuli o le tausaga e faatino ai le faatalanoaga lea e faataoto mai ai polokalame a le Malo o Saina mo Malo nei e valu o le Pasefika ae saofafai ai ma Niu Sila ma Ausetalia.

O le taua o mea nei, ona o lipoti uma nei e tapena mai fafo, o lipoti e omai talanoa mai ia tatou ona avatu ai lea o faamatalaga faamaumau i totolu. Ua ou taua le mea lea ona o lea e i ai isi i totolu o le Maota lenei e tau fesili mai lava po o le a le mea ua eseese ai, o i inei lea e avatu ai fuainumera ma e taua tele le vaega lea, afai la na sau le savali mai ia Mati o le tausaga le la ona omai loa lea talanoa, o le a le tulaga na i ai le economy i le tausaga e tau i le masina o Tesema o le la tausaga? O lona uiga o lea e talanoa agai fuainumera agai i tua, a o mea ia e avatu e le Malo, o mea e tau mai i le taimi lenei. Lau Afioga i le Fofoga Fetalai, aua foi a pasi loa le tala o le Tupe, amata loa ona gaoioi le Matagaluega e totogi aitalafu ia ma alu ifo ai i lalo. O le mea la lea, o outou ia e fesili soo, fesili soo, fesili soo ma pei e foliga mai a avatu fuainumera a le Malo e pei e fesili mai, a o la e fai mai o, o i inei lea e avatu ai, o mea moni lea e avatu i inei. Ae manatua la, e oo foi la i mea na i le tausaga lea talu ai e tau mai i le taimi lea na omai ai. O lona uiga la, o lea ua fesili mai i le lipoti lea e avatu o mea pito sili ona fou lea e avatu ma sao, e tau mai i le taimi lenei.

Lau Afioga i le Fofoga Fetalai, ua ala ona ou talanoa atu, ona e avatu a fuainumera ae fai mai, e sese fuainumera e sao mea la e aumai o. O fuainumera la e i o o mea na avatu i inei faatatau i le taimi i tua tua lava ina ia silafia ai e le Maota lenei le tulaga o lea e faatino ai e le tatou Malo ana galuega fai ma faamaumauga.

FOFOGA FETALAI: Malo. Tulai mai le Minisita.

Afioga Hon SILI EPA TUIOTI: Faafetai i lau Afioga i le Fofoga Fetalai. Ia o lena ua faaopoopo atu le faamalamalamaga a le Afioga i le Palemia.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O le isi vaega e taua tele i le feutagaiga ia a tatou ma tatou paaga mai fafo, o le tulaga lea i le latou foi silasila mai ia i tatou i le tulaga lava ia o le tatou governance, le tulaga o le leadership, political leadership, e le gata i totonu o Samoa nei, ae faapena foi ia i tatou e tausolomua lava i totonu o faalapotopotoga ia o le tatou Pacific Islands Region, i totonu o faalapotopotoga o lo o i ai e pei o le Pacific Islands Forum ma tulaga faapena, o le tulaga o le lelei tapena o tatou fuafuaga o le atinae, o le tulaga o le tatou fesootai pea ma tatou faiga paaga ma soalaupule i tulaga e aumai ai le fesoasoani ina ia faapena ona mafai foi e tatou ona matauina. O se isi galuega taua lea a le Ofisa o Tupe faapena foi le tele o Matagaluega o lo o latou faatinoina le tele o tatou atinae tetele ia, o le tulaga lea ina ia vaavaai ai ina ia vave ona faatinoina o tatou atinae tetele nei. O le mafai ona tatou... i so o se taimi lava, ia fesootai, o le mea taua lena o lo o i ai ina ia malamalama latou i le tulaga o i ai, o a ni faafitauli ia faapea ona vave ona foia.

Lau Afioga, ona ou see atu lea i le tulaga e pei ona laga foi i nisi o lauga i le tulaga lea o le tolu tausaga talu ai faapea na fai le tatou estimate e deficit, a o lea ua uma tausaga ia e tolu ua mautinoa lava ua maua le surplus i le tatou Tala o le Tupe, ma o i ina o lo o faailoa ai le tulaga foi o le vaai totoa i ai a le Ofisa o Tupe faapea foi Matagaluega taitasi ina ia faapena ona faaaoga tatau a tatou vaegatupe ina ia faaaoga e faatino ai galuega e tautua i le atunu ma tatou atinae tetele o lo o i ai. O le tulaga foi lea ua toe tilotilo i ai i nisi o vaega e tatau ona toe mataitu ai pea le vaiga ona o le tulaga o le tele o tupe lea e le o faaaoga i se tulaga e fesoasoani ai i le tatou tamaoaiga. E pei la muamua ua i ai le faaiuga a le Kapaneta, e pei ona silafia i le taimi lenei i Matagaluega ma Faalapotopotoga e tai faatau lava taavale i masina uma, pe faatau tasi le taavale, lua taavale pe tolu. O le faafitauli o lena faiga, e le o mafai ai ona fai se bulk purchase arrangement, ina ia mafai ai ona tatou maua mai ni faapau o le tau mai a tatou kamupani ia o lo o faatauina taavale. Ua maea la ona faia le talanoaga foi ma kamupani taavale, ma o lea foi la ua fautua ai le Matagaluega o le Tupe ma ua talia foi e le Kapaneta i le faiga faavae, e na ona faalua lava i le tausaga ona toe faatau taavale a le Malo. Ma le faamoemoe, o le a fai a tatou oka o Matagaluega uma a le Malo ma Faalapotopotoga Tumaoti, ina ia faapena ona fai le bulk purchase lea, maua mai ai ni discounts mai suppliers. Sa talanoa mai le tasi o kamupani o lo o faatau mai taavale, o la latou matau i ai o talosaga uma lava a Matagaluega i tulaga tau taavale ma mea faapena, e pei ua faamamafa lava i le tulaga mo luxury cars, taavale ma tulaga faapena, ae o lo o i ai lava taavale latou o lo o i ai uma lava manaoga i le fatinoga o galuega offsite o i tua.....o lea la ua toe faamalosia ai le faiga faavae lea a le Malo, ina ia tuufaatasia ona fai lea o le tatou bulk purchase.

O le isi vaega ua toe tilotilo i ai ina ia faaleleia atili lava le faaleleia o a tatou tupe, o le tulaga lea o le faamalosia o le faaaogaina o upega tafailagi, websites a Matagaluega ma Faalapotopotoga Tumaoti. E faasalalau atu ai a tatou galuega aemaise galuega tetele lea e faatauva.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E pei ona silafia o lo o ua tofu lava Matagaluega ma Faalapotopotoga ma websites. Ua leai fo se mafuaaga tatau e saga faasalalau ai i nusipepa ma tulaga faapena, aua o lo o mafai lava, o lea ua lelei le tatou technology. Ae le faapea la, o le faiga o le a fai i ai, o le a faasalalau pea pe tai masina i nusipepa, e na o le lisi lava o a procurement ia o le a faasalalau atu i le isi tolu ono masina lea, ina ia mafai foi ona faasalalau atu ma maua ai le avanoa o le Aufaipisinisi ma i latou e leai ni websites e tagatagai i ai ma fuafua i ai talosaga.

Tofa Olo Fiti Afoa Vaai: Lau Afioga i le Fofoga Fetalai.

FOFOGA FETALAI: Tulai mai le faauilavea a Salega Sasae

Tofa Olo Fiti Afoa Vaai: Faafetai i lau Afioga i le Fofoga Fetalai mo lou avanoa. O lea ua oo tonu lava le saunoaga a le Afioga i le Minisita o Tupe i le tulaga lea o lo o atugalu mai i ai le lipoti a le Komiti. Ma ou te faafetai foi i le Komiti i le silasila totoa i le vaega lea. I le tele o tatou tupe faaalu i mea ia o le faaaogaina o internets, lau Afioga i le Fofoga Fetalai, e tauala atu i lau Afioga se fesili i le Afioga i le Minisita o Tupe. O le tatou broadband, e fai uma lava mea ia tatou te mananao ai, talanoa i totolu o lo tatou lotoifale e aunoa ma se tupe e alu ai, e oo foi la i lau tilotilo atu i isi mea ia, nai mea fou ia e tai pei o mea ia sa fai i Vaipouli. E le tau faia le mea lena pe ana faapea e faataua le faaaogaina o le tatou broadband. E tasi lea atinae lau Afioga i le Fofoga Fetalai a lo tatou Malo. E ova ma le \$60miliona na faaalu ai, ae e le o fully utilized le mea lea. Pe aisea le mea ua faapea ai le faiga...

FOFOGA FETALAI: Tulai mai le Minisita o Tupe.

Afioga Hon SILI EPA TUIOTI: Lau Afioga leaga e le o faatasi mai le Minisita ona le matata lea, ao le tulaga lena o lea ua taumafai i ai le tatou SNPH lea, o le tulaga ina ia toe vaavaai i ai. E pei ona silafia o le Computer Services Limited lea sa latou vaaia la tatou broadband lena, e pei ona silafia, ua see atu lava le Computer Services ua ese le faamamafa la ua i ai. A o lea ua uma ona faatalanoa foi i nisi o latou na o mai i le World Bank ma le ADB, ina ia galulue faatasi ma le Matagaluega mo le Information ma Technology ina ia toe vaai i ai i le faaaogaina o le broadband lenei. Sa tatau ona fai i fesootaiga lava i totolu o Matagaluega ma Faalapotopotoga a le Malo; E sao foi le sui usofono i le tulaga lena, ina ia faasaoina ai tupe. Ae pei o le taimi lenei ua i ai foi le manatu ua talanoa mai foi a tatou kamupani tumaoti e pei o le Digicel ma le Bluesky, e pei o lo o talosaga mai i se tulaga e tatala aua ne i i ai se monopoly a le CSL e mai.... O tulaga na o lo o faatalatalanoa nei, masalo o se taimi lata mai ua maua se faaiuga i le toe faatulagaina o le tulaga lea.

Tofa Olo Fiti Afoa Vaai: Lau Afioga i le Fofoga Fetalaií

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

FOFOGA FETALAI: Malie le sui usufono. O a tatou Tulafono Tumau, e saunoa le Minisita i mea sa laga e sui mamalu. Afai e le i lavea i lau saunoaga e le mafai na tuu atu le avanoa e te toe fesili ai. O le mea la lea e faamalulu atu i le sui mamalu. O lea ua e tu ae te le i... e le i lavea le tulaga lea i lau saunoaga. O tatou Tulafono Tumau ua leva, e le o se mea na fai nei, ananafi.

Tofa Olo Fiti Afoa Vaai: Lau Afioga i le Fofoga Fetalai, sa i ai i lau faamatalaga le vaega lea, lea foi sa ou talanoa i le tamaoaiga e lavea uma ai mea ia.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai. O lea ua uma ona saunoa le tatou Minisita sa gafa ma mea uma lava ia tau ID, e le i tulai le sui usufono e laga mataupu ia. O le mea moni lava o lea ua uma ona saunoa atu le Minisita o Tupe e toe faamanatu, o lea e i ai le galuega tele lea o lo o gafa ma le Malo aemaise le Faalapotopotoga i le tuufaatasia o gaioiga uma ia e avea ma responsibility for supervision a le special authority a le Pulega, ina ia faalaugatasia uma ai le service atoa, e tuuitiitia ai seleni soona alu vale. O le mataupu lena ua uma ona tagofia e le Kapaneta. Ma e masalo ana laga e le sui Minisita ua faamatala atu foi e le Minisita. Ae pei o nai mea ia faatoa te i te i ai le sui usufono, ona aumai ai lea o ia mea fou, ae ua galo e ai le tatou tulafono. O i ina e atagia ai le sui usufono e mataala, aumai uma lava i le saunoaga, ae le o le faatei foi lele o le isi Minisita e faapea e maua ai sona ai. E le maua ai se ai faaopoopo na o ai toese.

FOFOGA FETALAI: Tulai mai le Minisita, malie le sui usufono.

Tofa Olo Fiti Afoa Vaai: Lau Afioga i le Fofoga Fetalai, na ou tu i luga ou te au ma ou lagolago i le mea mea e saunoa i ai le Minisita o Tupe, i le mea lea ua atugalu i ai... Ae ou te le o tu i lugai

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e le o manaomia foi saga lagolago. Ia o anafea ea e lagolago ai i ni mea a le Malo? E na o le tetee tetee tetee, e matua le manaomia lava sau lagolago.

Tofa Olo Fiti Afoa Vaai: Lau Afioga o le tetee e faatupu manatu. E le se matua tetee le tetee lea.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

FOFOGA FETALAI: Aua foi ne i faapea sui mammal e, aua foi ne i maua outou finagalo i le lauga a le Minisita, ona outou tulai mai lea e toe fesilgia pe tapa mea fou ina ua maua e lo outou finagalo. O le tulaga lena, ae tuu atu ia le avanoa i le Afioga i le Minisita, e faaauau ai le saunoaga.

Afioga Hon SILI EPA TUIOTI: Faafetai i le Afioga i le Fofoga Fetalai, ia sa laga foi e se tasi o.... ia le tulga lea ua i ai a tatou atinae ua ave i ai le faamuamua i le taimi lenei, lea sa faaalia ai le finagalo i le tulaga lea o le tatou fale fogafale lima fou lea o le a fuafua e fausia i luga i Savalalo. O le faafetai mo le lagolago, ae taua lava le finagalo o le sui usufono ina ia faapena, o le taua o le mea lea e faaaoga i ai la tatou Private Sector. E latou te maua ai foi ia galuega ma tulaga faapena, ma le tulaga ia e tatou te vaai pea tatou ia tatou Faalapotopotoga Faaputugatupe po o le NPF, po o le UTOS po o le ACC, o latou uma lava na e talitonu ua gafatia e latou faaputugatupe ia e mafai ai ona fesoasoani e faatupe le fale lea. E taua lava le vaai mai foi o le atunu o lea ua toe faaaoga lava tupe a Faalapotopotoga nei, e invest i totonu o Samoa aemaise lava ina ia maua ai galuega a tatou contractors ma faapena foi ona faaaoga ai tupe a Faaputugatupe a tatou Faalapotopotoga ia e faaaoga i totonu e fausia ai nisi o fale ona o le tulaga ua le lava Ofisa mo le aufaigaluega a le Malo.

Lau Afioga o le tulaga ia.... e i ai nai lauga faalauaitele i nisi o fuafuaga lea e ave i ai le faamuamua a le Malo. Atonu e pei ona ou tali atu, o lea e le i faasolo i Minisita e ona ia tulaga ia, e pei o le tulaga lea na laga o tupe e faatupe ai a tatou auala galue. E mautinoa lava e sili ona tele tulaga o le talosaga mai pe a fua i vaegatupe ia ua i inei. Ae pei o le fingalo foi o le Palemia ma le Minisita ma au nei, ua tatau ona fai se tulaga e asiiasi muamua auala nei. E matau ina ai po o i ai ni atinae, ona ave lea o le faamuamua i le tulaga lena. A ave i ai le faamuamua e faapea foi le faamuamua i auala e faata, aemaise faleaoga ia ua i uta, ina ia faigofie ma saogalemu ai foi le feoaiga a le fanau. Ma toe fesoasoani atu ai i nisi o faletalimalo ia e i totonu o nuu ma alalafaga ina ia faapena ona saogalemu foi i latou o lo o femalagaai i le faaaogaina o le tulaga lea.

Lau Afioga e na o sina tala puupuu lava i le taiala lea i le Samoa o le 2040, o le taimi nei o la ua amata le tulaga i le faatalatalanoa, ma e le gata i totonu o le Malo faapena foi, sa fai le fono i le vaiaso i tua, sa i ai uma sui o faalapotopotoga i tua, o sui o tamaitai o pulenuu, ina ia faapena ona fai se latou saofaga i le tulaga o le tapenaina o le atinae lenei mo tatou.

O le aso 20, masalo o le weekend nei, o le a see atu ai le faatalanoaga lea i le motu i Salafai, e faapitoa mo i latou ina ia faapena foi ona faamatala ma auiliili ma faaali foi ni finagalo o i latou i le tulaga e i ai. O le mea mautinoa lava o le tausaga e 2040, masalo o le toatele o i tatou ua tatou retire, ua le toe faipule, po o ua valaauiна foi e le Atua.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Ae o le tulaga lava lau Afioga e pei ona tatou talanoa i ai, o se tatou miti lea, o se fuafuaga lea, le vaai mamao i le tulaga ia oo atu i lena taimi ua maualuga le per capita in income ua maualuga le tatou tamaoaiga aua ne i lalo ifo o le 5%, faapea o le taimi nei lea e i ai ia, vaitaimi lenei e i ai le taimi ua i ai le tausaga ua alu ai i luga i le 7%, pau mai i le 2% ma faapena, ae ua tatau ona i ai se tatou tamaoaiga e tumau ma malosi, ma ia maua le maualuga e tatau ona i ai.

O le tulaga foi i le faatupeina, e pei ona silafia e tele galuega ia ua galue ai le Afioga i le Minisita o Tupe Maua, aemaise le tulaga o le technology e mafai ai i soo se pisinisi lava e mafai ona iloa atu e le Matagaluega o Lafoga le tulaga o le GST e tatau ona totogi. Masalo o le a tele le fesoasoani i ai i lena foi tekonomensi, faapea foi lo tatou scanner lea e aumai e scan ai containers uma ia e taunu mai i le uafu. Ina ia mautinoa, o oloa o lo o i totonu o containers ia o lo o tutusa lelei lava ma le lisi o oloa ia e aumai. E faigofie ai ona fai le assessment o tiute e tatau ona fai. Ou te talitonu o lena ma nisi tulaga faaopoopo atu i ai, o le a fesoasoani e siitia i luga a tatou tupe maua, o le a mafai ai ona fesoasoani i le faatupeina, e le gata i le agai i luma, ae tali atu ai foi i manaoga o sui usufono, ona o le fia fesoasoani i le itumalo.

Ae momoli atu le faafetai tele lau Afioga mo le avanoa e tali atu ai i fesili, o le avanoa foi lenei se i momoli atu ai le faamalo ma le faafetai i lou itumalo ia tapaau ma Salelologa, i le aufaigaluega paia a le Atua o lo o tatalo ma tapuai mai, ia ua fesoasoani ai foi e faafaigofie ona fai se sao o lenei itumalo e le gata i le tapenaina o si o tatou tamaoaiga mautu, ae o le tulaga i le tatou Tala i le Tupe, le fuafua ma faasoa, ia ae faafetai tele mo le avanoa, ia manuia le taeao.

FOFOGA FETALAI: Malo faafetai, faafetai saunoa i lau Afioga i le Minisita o Tupe, ia ma ua oo mai le faasologa i le saunoaga a le Afioga i le Minisita mo Tupe Maua, tapa ma le faaalaloalo.

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai mo le avanoa, faatalofa atu foi i lau Afioga i le Fofoga Fetalai, aemaise le Afioga i le Palemia, paia i le Kapeneta, Minisita Lagolago, faapea foi Afioga i Taitai o Komiti ma le la itu o le Maota ia Afioga i sui usufono. Faatalofa atu foi i le paia o le malosi o le aufaigaluega o tatou faatasi i Ofisa Sili o Pulega o Matagaluega ma Faalapotopotoga Tumaoti o le tatou Malo, ia aemaise foi le atunuu o faafogafoga mai.

Lea ua... i le matou Matagaluega e leai nisi e toatele sa afea, ma ou te talitonu foi e le umi se faamatalaga. O lea ua faailoa atu e le Afioga i le Minisita o Tupe nisi galuega o lo o tapena e le Matagaluega aua le agai i luma i le 2040.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Ou te talitonu lau Afioga i le Fofoga Fetalai, o le tatou tamaoaiga ma le tatou atunuu, e leai se isi ituaiga o faamoemoe i ai le aoina o le seleni ia aua le tamaoaiga, na o lafoga. E leai ni minerale i lo tatou atunuu, e maua mai ai se isi fesoasoani. O lona uiga o lea faaupuga lau Afioga, e tatou te faamoemoe i o tatou lima, tatou te faamoemoe i le aufaipisinisi, ma le mamalu o le atunuu atoa, e tofu sao aua le atinaeina o le tamaoaiga, ona pau lea o le... e maua ai le fesoasoani e fai ai atinae o lo o manaomia e o tatou itumalo eseese uma, aua e leai se sui usufono e le tagi mai, i ni mea e manaomia mo lona itumalo. Pau lea o le auala e sue ai tupe, o lafoga.

Lau Afioga i le Fofoga Fetalai, e talitonu o le Paketi ua tuuina mai ia te i matou i lenei... amata atu ia Iulai e tau ia Iuni o le tausaga fou, e \$539 miliona matou te sailia mai. O le Paketi lea o le a faauma nei ia Iulai, i le amataga o Iulai ma le faaiuga o Iuni, i le nofoaiga lenei, sa i le Tala Autu o le Tupe e \$528 miliona e saili, i le Tala Faaopoopo o le Tupe i le faaiuga o le tausaga na faaopoopo ai le isi \$2 miliona, na matou taumafai e ao le \$530 miliona.

Lau Afioga i le Fofoga Fetalai ma le mamalu o le tatou Palemene nei, e oo mai i le Aso 17 o Iuni ua \$507 miliona ua... toe \$22 miliona ona taunu lea i le \$530 miliona. E i ai le sui usufono sa fai mai na luiina au, ia oo atu i le faaiuga o le nofoaiga lenei ua oo atu i le \$550 miliona se tupe maua. Ia e talitonu le agaga ma le faamoemoe, atonu lava e taunu lea miti, ae po o le a lava le aluga i ai, e talitonu po o le a lava le faamoemoe, tuu i le Atua lo tatou faamoemoe o ia e fesoasoani mai ua lima vaivai ia lo tatou atunuu, aua e na o le pau lea o le mea e mafai ai ona faataunu ia atinae.

E momoli foi le faafetai i le aufaigaluega, Faalapotopotoga uma lava a le Malo, tofu sao uma lava i le aoina o lafoga aua le tamaoaiga o lo tatou atunuu.

O tekonomosi ia ua faamoemoe le Matagaluega e faatalanoaina ma le Private Sector ma le atunuu, e i ai la mea e tau o le TIMS (Tax Invoice Monitoring System) e record ai VAGST, so o se faatau lava so o se faleoloa lava e record. O lea o le a amata faatalanoaga ma le Chamber of Commerce aemaise foi le mamalu o le atunuu, e fuafua lea polokalame pe a faataunuina e amata ia Ianuari o le tausaga fou. O lea foi e taunu mai le tatou X-ray i le tausaga fou, aua o lea e fesoasaoni mai ai ia le ADB i le faatupeina o le X-ray lea mo le uafu.

E i ai foi ia le isi system e tau o le CASTLING e faamoemoe la lea mo le Ofisa o Tiute, o le isi o le faamoemoe mo le Ofisa o Lafoga. Ae o le faamoemoega lena o le isi system lea mo le Tiute, e faatalanoa foi ma le atunuu. O le system lea, ae le i tuua e le vaa le po na sau ai, ua record uma i inei le uta la e sau i mea e aumai i Samoa nei. E taunu mai le vaa lea, ua maua uma lava oloa lea i luga o le vaa lea e sau ma aumai i Samoa nei e tapena ai le tiute. O le isi foi lena faamama avega i galuega a le Ofisa o le Tiute, ina ia faigofie ona faataunu mai ma ave i tua oloa a ua uma ona totogi ia tiute a Kamupani. E tai tutusa lava ma le system, o lo o i ai i le taimi lenei, o le eseesegea soo se taimi e tuua ai le vaa, o fea lava le po... e i ai le kamupanai lea ma le system lea, ia e mafai ona record uma e le system a le Ofisa o Tiute le oloa la e sau ma le vaa.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O faamoemoega uma ia ma tapenapenaga na a le Ofisa o Tiute aua le agai i luma. O le faamoemoega lava ia, po o le a lava le auala e mafai ai ona fesoasoani i le faateleina o a tatou tupe maua, ia e faamoemoe i le tatou galulue faatasi.

Ona oo mai lea lau Afioga i le Fofoga Fetalai i le Matagaluega o Falepuipui ma le Ola toe Fuataina, e le o po se lilo i le galuega ua maea nei, i le nofoaga fou i Tanumalala. O le a faapaiaina i le Aso Faraila i le itula e 10:00 i le taeao. Ia o le vaiaso foi lenei, sa fai ananafi le lotu faamavae i uta i Tafaigata i le faaiuga o lenei vaiaso, ua sii le nofoaga i Tanumalala, ia ma amata ai ona faaaogaina le nofoaga lea. O lea a faapea e le i maua sau tusi valaaulia i le mamalu o le Palestene, ia lea ua avatu le valaaulia, tatou faatasi ai i le Aso Faraila i le itula e 10:00 i le taeao e amata ai le sauniga, faapena foi i Ofisa Sili o Pulega o Matagaluega ua o tatou faatasi, ia o lo o tele le tapenaga aua le faamoemoe... e ese foi ia le tulaga o lea aso, ona o lea o le a tatala ia le Falepuipui fou, mo le nofoaga e avatu ai e o lo o nofosala e toe atinae ai ia o latou olaga.

O Savaii, o le taeao lenei o la ua opoa ai le sima o le faavae o le falepuipui i Vaiaata, tatala i ae amata Vaiaata, o le mea e lelei i Upolu, e lelei foi i Savaii. O le agaga lena ua fai ai foi le falepuipui fou i Savaii, ona o le faamoemoega ia lelei foi le nofoaga i Savaii, aua a outou agai atu i Savaii, o le toatele lava o e e o atu i Savaii, e matua leiloa lava o se falepuipui le nofoaga lea e i Savaii. O le nofoaga o se aiga, ma e o le naunautaiga lena ina ia tumau ai pea e pei o se nofoaga o se aiga, o la e faifamea faatasi. O le mea foi lena e ala ai ona screen uma ia pagota e ave i Sasae, ona e 470 eka o lo o i Savaii, o i ina o lo o sau ai le fofoga taumafa o le falepuipui, e 500 eka o lea e i Tanumalala, ia ae o le tele o vaega eleele lea e gaoa. O lena la e faamoemoe i Savaii aua le fofoga taumafa, mo le falepuipui i Tanumalala aemaise foi Savaii lava ia.

Ia e talitonu lau Afioga i le Fofoga Fetalai, e leai se isi... e pau na o manatu ma lagona, o le agaga lava ia taumafai e saili ia po o le a lava le auala e maua ai se tupe o le tatou atunu, e taumafai le Matagaluega o Tupe Maua, ia aua le galulue le Matagaluega o Tupe Maua, ia talofa e i le miti a le Minisita o Tupe, e le taunu, e le taunu. Ia ae faamoemoe i le Alii, e faamoemoe foi i le aufaigaluega, e le faigofie le galuega, o le lapataiga lava i le matou aufaigaluega, e itagia tatou, e amata mai lava le olaga e itagia lava nei mea o lafoga, le au ao lafoga. E pau le galuega e fai, o le a lava le seleni e maua, ia saili aua le manuia o le atunu. Tatou te galulue mo toeaiina ma olomatutua la e i tua, ia lelei le auala, lelei le vai, o a uma mea e manaomia ai le fesoasoani, o la e mafai i le lava o tupe, aua a faaletonu ua le atoa foi le Paketi a le Minisita o Tupe.

Ia, lau Afioga i le Fofoga Fetalai, ona ou oo mai lea i si ou Itumalo faapelepele o le Vaa o Fonoti, o au o le sui usufono mo le Vaa o Fonoti, ia le aualii lea na vevesi i le mea lea, o au o le sui usufono mo le Vaa o Fonoti. O le taimi lenei o lea ou te faipule ai, faafetai i le faaeaea a lou itumalo pele, lua nofoaiga tuu mai le tou faaeaea ia te au.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Faafetai foi i le Toeaina Faatonu, ma le paia o le faafeagaiga taulagi o le itumalo i a outou tatalo, atonu o lea e maua ai le malosi o le tou sui usufono, ia agai i luma ia lo tatou itumalo e, manaomia pea e la outou sui usufono la outou tatalo i lea aso ma lea aso, ina ia ou maua pea le malosi. Ia aua o lea matuai ou malosi lava, ae ou te leiloa i le auvaega lea, ia o lea ou te malosi e tauave ai tiute aemaise foi faitioga a le atunu, leai, e faigofie, o faitioga uma e le faapea e sese, o faitioga e taua mea la e aumai ai i totonu e faaaoga. E i ai foi ia viiga e le sao uma, o le olaga e faapena, vivii oe i luma i i, ae o atu i tua fai ai ou tala, ae o le talitonuga e faamoemoe i le Alii, o Ia e aumaia le taiala i mea uma tatou te faia.

Ia o se matou upu lea lau Afioga i le Fofoga Fetalai, manuia le Maota, manuia foi le faafogafoga mai a Samoa.

FOFOGA FETALAI: Malo, ia e momoli le faafetai i le Afioga i le Minisita mo Tupe Maua i le saunoaga e puupuu a ua leai se vailiu e le i oo i ai le saunoaga i mea sa taua ma laga e sui usufono mamalu o le Palemene, malo faafetai.

Ia ua oo mai ia le faasologa i le Minisita mo le Soifua Maloloina.

Tofa Hon FAIMALOTOA KIKA IEMAIMA STOWERS (Minisita mo le Soifua Maloloina): Lau Afioga i le Fofoga Fetalai, ia avea ia lenei avanoa e faafeiloi ma faatalofa aloaia atu ai i lau Afioga, malo le lavapapale aua foi le faatautaiga o le Fonousu a Samoa. Faatalofa atu foi i le Taitai o le Maota, lau Afioga i le Palemia aemaise foi le Sui Palemia, malo le malaga manuia mai i fonotaga sa faapena ona auai atu i ai sailiga manuia mo Samoa. Ia le paia o le aiga Kapeneta, a outou Afioga i Minisita Lagolago, faatalofa aloaia atu. E faapena foi ona faatalofa atu i Taitaifono o Komiti Faapalemene o le Maota, aemaise o sui usufono mamalu uma lava o le Fonousu a Samoa. Faatalofa aloaia atu foi i le saofaiga a Ofisa Sili o Pulega o Matagaluega eseese a lo tatou Malo, faapena foi i Faalapotopotoga Tumacti, ia o outou tauau o lo o mamafa i ai ma o lo o lima ma vae atu i ai le Malo, e le gata o la outou fautua ma le tuualalo, aemaise o le tulimatai o le faatinoina o galuega ma feau eseese o moomia ai a outou Afioga aua le tautuaina o Samoa ma ona tagata. E momoli atu foi le faamalo, e faatalofa atu i lau Susuga i le Failautusi o le Maota ma le aufaigaluega, faamalo mo le tautuaina o le Fonousu a Samoa.

E faatalofa foi i le faafogafoga tapuai mai a si o tatou atunu i Lana Afioga Mamalu O Le Ao o le Malo ma le Masiofo, Sui o le Fono a Sui Tofia ma le Faletua, lau Afioga i le Sui Faamasino Sili ma le Ofisa o Faamasinoga ma le paia maualuga o Samoa i ona tulaga faalupe, aemaise ai o le faatalofa aloaia i le aufaigaluega totofi a le Atua i so o se fatafitaulaga o lo o faapena ona nonomanu aua se manuia o Samoa mo a taeao.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E avea foi lenei avanoa ou te faatalofa atu ai i le faafogafoga tapuai mai a si ou Itumalo o Gagaifomauga Nu.1 ia Safotu ma Manase aemaise o le aufaigaluega faauuina o le Talalelei, faamalo le tatalo faamalo le tapuai. E lagona lava le lototele ma le mafanafana ona o la outou tatalo ma la outou tapuaiga, faafetai, o la outou pule lea.

Lau Afioga i le Fofoga Fetalai, ae le i faia se faamatalaga e tusa ai o sausaunoaga a sui usufono mamalu, ou te fia momoli le faafetai i le Afioga ia Tuitama, le Afioga i le Minisita sa tu i le foe o le Matagaluega o lea ua ou agai atu i ai, aemaise o lana auaunaga i tausaga e tele i le tofiga faa-fomai, ua tele lona sao ma lana tautua e ala i le soifua maloloina o Samoa. Malo le tautua atunu. Ia, ma o le a taumafai le Minisita fou i le mafai e gata ai e faaauau galuega lelei e faaleleia atili ai ma siitia le auaunaga a le Matagaluega aua le soifua maloloina o si o tatou atunu.

Lau Afioga i le Fofoga Fetalai, ou te fia momoli foi le faafetai i si a matou Matagaluega, na ou faapea e faigata le galuega, e pei sa ou tau faatu foi lele po o le a se latou tali mai. Lau Afioga i le Ofisa Sili ma le mamalu o le Pulega, faafetai i le tele o galuega o lo o galulue punouai ai i le fesoasoani i vaega eseese o le auaunaga aua le siitia ma le faaleleia o le tautua a le Matagaluega. Faafetai tele foi i le lagolago a le Sosaiete o Fomai o lo o galulue i le Malo i totonu o le Matagaluega. Faamalo le fai o le faiva, faafetai le tautua. E toe faaleo aloaia atu ai a o faafogafoga le Maota aemaise foi le tapuaiga a Samoa, faafetai i le tusi sa outou faaooina mai ai la outou lagolago i le Malo, aemaise o la outou galuega i le Matagaluega e ala i la outou tautua, ona o nisi foi o finagalo sa faapena ona faasalalauina i se taimi e le o mamao atu. Ia alofagia e le Atua e ona le mana ma le malosi uma lava, faamanuia i o outou tiute ma feau ina ia auala mai lona mana faamalolo e ala i a outou galuega, e fesoasoani ma maua ai le mapusaga i mai o le tino ma mafatiaga e feagai pea ma si o tatou atunu i lea vaitaimi ma lea vaitaimi o le soifuaga.

E momoli foi le faafetai i se tasi o vaega tele aupito taua aemaise o le vaega aupito toatele lea o le aufaigaluega a le Soifua Maloloina, o le au tausisoifua lea foi sa laga mai foi nisi o finagalo. Faamalo le galulue, faafetai i la outou tautua. E taua tele le vaega lea pei foi ona faaalua e nisi o sui usufono aemaise foi o ni faitioga e masani ona faalogoina, e le po pea se nuu. Faafetai i le vaega lenei e taua tele ona o i latou o lo o saoaluma i le galuega a le Matagaluega, o i latou e muamua ona tau atu i ai gasegase ma o latou aiga i taimi e kili atu ai i so o se falemai, i o outou foliga tausaafia, o outou aao alofa ma aao agalelei e faapena ona mapu mai i ai tiga o le au gasegase faapea foi nai aiga o lo o omai ma le popole. Faamalo le tautua. O le aufaigaluega atoa i avetaavale e oo lava i le au kilini, e taua le lagolago a tagata taitoatas.

Ou te fia faaleo le lagolago malosi a lau Minisita Lagolago, i le tele o le taimi i le faasoasoaina o le taimi, malo i lau Afioga Tofa i le lagolago mai i le ta galuega faifaatasi.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Lau Afioga i le Fofoga Fetalai, ona ou oo ai lea ou te faafetai atu i sui usufono mamalu uma sa lagolago mai i a latou sausaunoaga e tuualalo, e faapena foi saunoaga sa faaleo mai ai manaoaga o nai o latou itumalo. Ma le ava tele aemaise o le faafogafoga mai a nai outou itumalo, ia o lea ua maea ona ou faamauina, e le gata ia au a o le Minisita Lagolago, faapea foi le Ofisa Sili ma le vaega o Pulega lea e tapuai i totolu o le Maota i mea uma sa outou sausaunoa mai ai. Ae ou te faamalamalama atu i sina faamatalaga faapea, o le tele o mataupu lea sa laga mai, ua faapena ona i totolu o a matou lipoti e ala i a matou asiasiga i le masina muamua o le Minisita. Sa matou faasoosoo i falemai i itumalo uma i totolu o le atunu faapena foi i sub-centres i Upolu nei faapena le matou motu tele i Salafai. E le gata i lea o vaipanoa uma o le falemai i Tuasivi, aemaise le tatou falemai tele i Motootua.

Lau Afioga i le Fofoga Fetalai, ua na o ni nai vaega o mataupu pei ona folasia mai e sui usufono, ae ou te fia faailoa atu le anoanoai o isi vaega e sili atu ona taua ma moomia vave i le taimi nei o lo o moomia aua le faatinoga o auaunaga eseese mo le togafitia o gasegase. Mo se faataitaiga, e tele masini faaonaponei ma meafaigaluega o lo o moomia le faatinoga o galuega a alii ma tamaitai fomai ma le au Tausi Soifua, o le faaleleia o le tele o isi o potu o lo o faaaoga e fomai e vaai ai gasegase, o lo o faapena ona tele mea e moomia i totolu o isi falemai i nuu i tua ma Savaii, e moomia ni pusaisa faapitoa mo le teuina lelei o vailaau ma fualau mo togafitiga, ni ea malulu i mea o lo o galulue ai fomai i le taunu atu o gasegase. Oka oka le tele o le mau mea o lo o moomia e tatou falemai i nuu i tua faapea Savaii.

E tele falemai o lo o moomia nisi moega, ua leva moega o lo o faaaoga ma o lo o moomia ai se faaopoopoga, na o le tai fa, tai ono moega i isi falemai, e moomia tele mea o lo o faapena ona taunu atu i ai le mamalu o si o tatou atunu o lo o maua i gasegase.

E le gata i lea o vaega foi nei o le falemai i waiting areas e faatalitali ai le gasolo atu i totolu e vaai le fomai, e moomia ni nofoa ma ni faapaologa. Atonu o lena ua molimau i nisi o falemai i nuu i tua, ua maea o lena ua faagasolosolo atu i nai toe sagone sa totoe i le paketi o lenei tausaga nisi o fesoasoani vave lava o lo o outou moomia mai. E i ai le falemai i Tuasivi, e faapena ona moomia e Savaii... tai pei lava foi ona malie i saunoaga, o mea e lelei mo Upolu nei, faamolemole and lelei foi mo i matou i Savaii.

Ia, o se CT Scan mo le falemai i Tuasivi, atonu e tuuitiitia ai foi le malaga mai i Apia ma faatumu ai Apia. Ia, o si fomai Toga la e i Savaii po o Sione ea lona suafa, fai mai, ðMinisiter, the days of Noah na omai ai,ð o le a foi le tauga o le masini leaga e le o au o se fomai o lea e tau vave ona ou aoao i igoa o masini ma terms faa-fomai, e faapena le ultra sound o lo o faapena ona moomia vave le faaleleia, se masini faaonaponei, tele mea e moomia, o le faata ma mea faapena.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O le tatou falemai tele i Motootua, o le tele ma le anoanoai o vaega o lo o moomia mo le faaleleia o le auaunaga. Ou te momoli ai le faafetai tele i le Minisita o Tupe faapea le Minisita o Tupe Maua a le Malo. Sa ou tauanauina la Afioga nei ma maua ai o la avanoa se i omai matou te o atu se i o la silasila ma maimoa i le tele o mea o lo o moomia i uta i le tatou Maota gasegase i Motootua. Faafetai. Aemaise o le fale lea e gaosia ai ma gasese ai taumafataga mo le au gasegase, o le fale o lo o faapena ona taina ai ma faamama ie ma mea uma o lo o moomia mo le au gasese, aemaise o le fale o lo o fai ai taotoga ma tulaga uma faapena. E faafetai ai i a oulu Afioga. E tiga ona tele foi ouluu tiute ma feau ma galuega, ae sa faapena ona ouluu tali mai i lou faatalauula atu. A oo ai foi i le taimi e tuuina atu ai talosaga i Matagaluega a o lo o ouluu molimau, aemaise sa pue uma lua ata o mea eseese o lo o moomia, malo faafetai. Faafetai lava le lagolago.

Lau Afioga i le Fofoga Fetalai, o le a ou avatu sina faamatalaga puupuu lea atonu o le a taaofai uma ai o lea ua faafogfa mai e na sausaunoa, aua o le tele a o mea na sausaunoa mai ai ia toe fau ni sub-centres, ia tofu le falemai i tua ma le ambulance. O mea taua uma a nei mea uma tou te sausaunoa mai ai. Ia ana tele le faasoaa e tuu ni a? tuu i se a?. Ia ae o lo o faapena ona mataitu mea uma o lo o tatau ona ave i ai le faamuamua mo le taimi nei. Mo le silafia o lo o feagai le Matagaluega o le Soifua Maloloina i le fetuunaiga o le Matagaluega, aemaise ua toe o se aga ona maea lea o tapenaga o fuafuaga alualu mamaao mo le agai i luma. O lenei fuafuaga o lo o faailoa ai sini autu a le Matagaluega o le a galulue ai ma a tatou paaga mo le agai i luma.

O le sini aoao, o le faamalosia lea o le galulue faatasi o tagata uma, aemaise si o tatou atunu ina ia faamalosia le galulue mo le auaunaga muamua a le Primary Health Care mo le soifua maloloina lautele i nuu ma afioaga, aemaise o falemai ma auaunaga faaitumalo i nuu i tua. Ia faatumau pea le tulaga mauluga o le auaunaga ma ia saogalemu auaunaga faa-soifua maloloina i totolu o so o se falemai. Ia atonu foi i mea sa tutupu mai i taimi ua tuanai i totolu o lou itumalo i le falemai o lou itumalo, ia o lo o sisila fofoga o le Atua.

E aoga foi mea e tutupu e fai ma aoaoga mo le agai i luma, aemaise o le mataalia ma le toe siitia atili ai o le auaunaga a le Matagaluega. O lenei lava fuafuaga o lo o sosolo alamea faatasi ma le Tulafono ua pasia o le Soifua Maloloina 2019 lea na faamamaluina ia Fepuari o le tausaga nei. O nisi la o galuega taua ma polokalame ua fuafuaina mo le lumana, o le a faapea ona tali atu ai i le tele o vaega e pei ona faaleoina e sui mamalu i le la vaiaso atoa ua tuanai atu. Ua faataatia fuafuaga mo le faatauaina o le avatu i tua o le tatou polokalame o le BEN faasamo, i nuu ma afioaga i totolu o Samoa, ina ia mafai ai ona tali atu i faafitauli o gasegase e aafia ai totoga, faamai ia NCDs, o lea e tau foi o faamai oti, lea na faaopoopo mai ai le Afioga i le Minisita o Tupe.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O lenei galuega o lo o faatagisia ai le galulue faatasi o si o tatou atunu, i ona vaega eseese ma faapena ona manaomia ai aemaise o sui o nuu o sui o le Malo o sui tamaitai o nuu, aemaise le toe lalagaina mai o komiti tumama ina ia mafai ona gafataulimaina lenei polokalame ma mafai ona faaaau e nuu ma afioaga, ma avea ma polokalame e tausia ai lo tatou soifua maloloina, e galulue ai faatasi ma le Matagaluega nei.

O le toe ave o le faamamafa i auaunaga muamua le primary health care, e ala i le faasoasoaina lelei o alagaoa i falemai i tua, e ala i le i ai o auaunaga manaomia, multidisciplinary teams e pei o fomai faatosaga, o tausi soifua mo le soifua maloloina lautele, o i latou e tausia taumafa tatau, o i latou e asiaasia le siosiomaga ma le tulaga o le tumama lautele, ma isi auaunaga faasofua maloloina ina ia faapea ona i ai i le luasefulu fa itula fitu aso o le vaiaso. Ua ogatasi lea ma le saofaiga fou o le toe tuufaatasia o le Matagaluega lea ua pasia, ina ia mautinoa o lo o lelei faasoa lelei alagaoa ma seleni i falemai faaitumalo, e pei o taavale mo faalavelave faafuasei i ambulance, pei ona saunoa i ai le toatele o nisi o sui usufono na sausaunoa. Ia lava fualau ma vailau mo gasegase ma togafitiga, ma vaega uma e manaomia mo le auaunaga. E tele ia o masini faaonoponei o lo o fia manaomia aua le faatinoina o galuega a alii ma tamaitai fomai, atoa ma mea faigaluega. E taua foi le faailoa mo le silafia o lo o galulue faatasi le Matagaluega ma komiti tumama i nuu ma afioaga e fesoasoani i le faamamaina ma le tausia lelei o le siosiomaga o falemai ma le saogalemu o galuega ma le aufaigaluega aemaise o gasegase. O lo o fuafua e faalauaitele lenei auaunaga i se taimi vave lava e mafai ai, ma faaaau ai pea mo le agai i le lumanai.

O le avatu i tua o la tatou auaunaga faasoifua maloloina ua ave i ai le faamuamua ma le faamamafa i le taimi nei. E ala i le toe lalaga mai lea o komiti tumama, e talitonu o se auala lelei lea, mo le agai i luma o le soifua maloloina o Samoa. A faapea e... na ou ola mai lava au ia, ou vaai i na aso e alu atu le taavale pe toa lima pe toa ono le aufaigaluega teine tausisoifua pasi ua aoaoina lelei, e fua pepe ma fai tui puipui. A faasolo atu le galuega lea i tua, fua le toto, fua le suka, avatu ai i ina i le taimi lava lea ma le auaunaga o fautuaga faafomai. Ou te talitonu o le a tele foi ia se faamama avega i le paketi a le soifua maloloina e faatino ai nisi o mea ia tou te sausaunoa mai ai mo outou itumalo. O le mea lea e i ai i le taimi lenei, o le toatele o i tatou o lo o feoai pea, e aunoa ma le vaai o se fomai mai lea taimi i lea taimi, o i la, a fua le suka fua le toto o le toeaina, fai atu le fomai, toeaina olomatua brother o le tulaga lea ua i ai lou suka, o lea toeititi gapa fuainumera o le mea fuasuka. Po o le toto maualuga, e faapena, tuu atu i ai le avanoa, ia vave ona silafia ia gasegase o lo o manaomia togafitiga i se taimi vave ao le i oo i le tulaga foi lea ua oso faafuasei le gasegase kili mai, ua taumafai e... ua moomia le tauanau mai e ave i atunu i fafo, ae ona o le faatamala i le le vaai o le fomai i lea taimi ma lea taimi.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O le mea lea ua ou vaai nei i ai, ou te talitonu o le isi lea vaega o le paketi a le soifua maloloina o lo o... e le faitau afe o miliona mea ia e faitau i tausaga uma mo le togafitiga o le mamalu o le atunuu o lo o faapena ona saili i fafo togafitiga. Ona ua le mafai ona togafiti i inei, ona ua advance tele le alu a le mai, ae a vave ona togafitia, apalai i ai mea e tatau ona fai muamua i inei, e talitonu e le manaomia le avatu i fafo ma faapena ona faasao ai nisi tupe alu a lo tatou atunuu.

E faailoa atu foi o lo o faaauau pea lava le faiga faapaaga ma fomai tumaoti, e faapena ona fesoasoani ai e faatino auauanaga i falemai i tua, faapea tatou falemai tele i Motootua, faapena i le vaega lea o gasegase tausavalu, outpatient. E faapena foi i le falemai i tuasivi ona o le utiuti o le aufaigaluega.

O lenei laasaga ina ia mautinoa ia i ai se fomai ina ia galulue i falemai i tua i vaiaso taitasi. Ma siitia ai le umi o le taimi foi lea, pei ona sausaunoa mai ai nisi sui usufono e faatali ai le vaaiga o se fomai. Atonu a toe asiasti atu ua i ai se suiga i lenei taimi, ae onosai mai. O lea foi ua maea ona logo au e le Ofisa Sili ma tulaga foi ua faataatitia o lea foi sa saunoa i ai le Minisita o Tupe i le faiga faapaaga o lo o ua aumai ai le fesoasoani mai le world bank, e le gata i lena, o lo o ua fesoasoani mai ai le faalapotopotoga o le WHO, le Malo o Niu Sila le malo o Ausetalia, i le tuufaatasia o lenei fesoasoani o le a vave ai ona oo atu se fesoasoani a le Malo i le faaleleia o falemai i nuu i tua. Aemaise foi nofoaga e nonofo ai fomai e pei ona manaomia e tatou uma lava i totonus i lenei Maota, o lea foi ua laga e sui mamalu, ia ni fomai mo nuu i tua. Talosia ia i le Atua ia vave ona taulima lenei fesoasoani ma faataunu ai lenei faamoemoe i se taimi e le o mamao atu.

Ona avatu ai lea o se tuualalo i sui mamalu, lava papale mai, o lo o outou silafia e fou le Minisita e le i atoa se lua masina, a o le tele ia o outou finagalo faaalia, ia tuu mai se avanoa. E tele ma anoanoai isi vaega e le i oo i ai le suesuega ma le sailiiliga a le Minisita. E pei lava ona malie i nisi o a outou saunoaga e le i fausia Roma i se aso se tasi, ona ou faapea atu lea. Se ou te musu lava e fai atu le tala lea, taatia mai. Ae sili ia ona ou faapea atu, ia palalau maia outou fanoga, se i uma le Palemene ona fono lea o le paa ma ona vae, faatulaga le tele o mea ua matou matauina mai asiasiga uma nei i Upolu ma Savaii, Tuasivi ma le falemai tele i Motootua e tatau ona ave le faamuamua, i mea o lo o manaomia vave, masini faaonoponei ma le tele o mea o lo o manaomia mo le faaleleia o le auauanaga. Se i faaso le keke pe a, tele itiiti tatou felogonai. Na taua foi e le isi sui usufono e tatau ona foi le Minisita e fai sona ofisa i uta, aua le popole e augofie lava le Minisita, tamoe atu i gauta tamoe mai i tai nei, e faapena lava. Tau mai le mea i fea e augofie lava vae mama le Minisita e faataunu mea o lo o outou finagalo i ai. Sa i ai se sui mamalu sa manaomia le faapea mai, e fia maua sina masini faamama toto e avatu i tua.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O lea la sa ou... ae fautua mai le pule o le falemai faamamatoto atonu o lea e i tua i i le afioga ia Mulipola, Minisiter e fautuaina lau Afioga, e matua taugata lava o ia mea, e manaomia le fausia o se fale faapitoa e avatu i ai le masini pe tasi lava le masini, e manaomia se afi moli faaleoleo, tanevai faaleoleo masini faamama suavai, potu ea malulu mo le faatinoina o le auaunaga, ma le teuina o oloa faapitoa e aoga mo ia togafitiga.

E manaomia foi inisinia faapitoa mo le vaiai o masini nei, aemaise o le aufaigaluega aotauina faapitoa. Ona aumai ai lea o le fautuaga ia te au e le Ofisa Sili o le falemai, e taugata tele le auaunaga, ae o lo o talafeagai mo le Malo i le taimi lenei le auaunaga e faatino i se nofoaga se tasi. E tasi mo Upolu ma le tasi mo Savaii. Atonu e talafeagai le alu atu i tua le auaunaga pe a faapea ua sili atu i le lima po o le sefulu ni gasegase, ae a faapea e tasi le gasegase, tatou fesoasoani tatou o sui usufono i ni pasese e aumai ai gasegase e tasi, i lo le fia miliona lea o le a ave ai mea ia ua fautuaina au, ina ia palalau mai, e faapena ona tatou faasoa i ai.

Lau Afioga i le Fofoga Fetalai, i te i ua misi ia te au se isi tulaga ae o se faamatalaga lea e tuuina atu mo le mamalu o sui usufono o le Maota sa tutulai mai, aemaise o le faafogofa mai a Samoa ma lana tapuaiga, lava papale mai, onosai mai. E faapena lava ona faasolosolo atu le galuega ae se i ave le faamuamua i mea ua tatau ona ave i ai le faamuamua. O lo o i ai foi se tasi o sui usufono o lea e le i ai se tonu mautu ua fai mo le falemai i Vaipouli ae ua oo foi i ai la matou asiasiga. Ae mamao i uta le tulaga o i ai, ina ia maua le avanoa o fomai i falemai o lo o.... ae o le a i ai se fuafuaga i se taimi o i luma tatou fesootai. O se faamatalaga lea lau Afioga i le Fofoga Fetalai. Manuia tele le Fonousu a Samoa, faafetai mo le lagolago a nuu ma itumalo aemaise o le faatagi atu a le Matagaluega tatou galulue faatasi aua le soifua maloloina o Samoa ma nai ona tagata.

Faafetai mo lou avanoa, manuia le faatautaiga o le Fonotaga e lau Afioga i le Fofoga Fetalai, faapea le Maota mamalu a o faafogafoga Samoa i la latou tapuaiga. Faafetai lava.

FOFOGA FETALAI: Faafetai, malo saunoa e le faigofie faiva alofi lima. Ou te faasilasila atu o lo o toesea le Afioga i le Minisita o Faatoaga Vaomatua ma Faigafaiva ona o Fonotaga se lua o lo o auai atu i ai i atunu e mamao. O lo o i ai le Palemia e faapena ona malele ma saunoa a o le galuega sa faatino e le Afioga i le Minisita so o se taimi lava e tulai mai ai se sui usufono e taua le Matagaluega e tulai atu lava ma tali fuitau i mea sa laga e sui mamalu. O lona uiga ua maea ona saunoa le Afioga i le Minisita, ae ui i lea o nisi mea e toe laga, o lo o i ai le Palemia.

Ou te tapa ma le faaaloalo lau Afioga i le Minisita o Galuega. Faamalie atu ia i lau Afioga i le Minisita o Galuega, o lea ua tatou taunu i le tatou malologa.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

A o le i tuueseina galuega a le Fono Aoao, ua faailoa mai e le Afioga a le Minisita o Taaloga ma Aganuu, o le avanoa lenei mo le tatou malologa e tapueina ai ata, tulou le paia o le Fonotaga ma le faafogofaga mai o Samoa, e tapueina ai ata o le tatou Palemene i tua fale, ina ia mafai ona saunia ai ni tatou ID, ia ulufale ai i nofoaga o taaloga. Ia na o le pau lea o le avanoa, a le mafai ona maua le ID o lona uiga e leai, po o oe lava o le sui usufono e le mafai ona e ulufale. Ia o le faaaliga lea ma le agaga faaaloalo. Sainia lenei faaaliga e Loau le Minisita o Aoga, Taaloga ma Aganuu.

E faasilasila atu ua faataatiaeise galuega a le Fono Aoao mo lana malologa, faafetai.

Na faataatiaeise Taualumaga a le Fono Aoao Faitulafono mo lana malologa masani i le itula e 10:42 i le taeao ma toe faaauau i le itula e 11:35 i le taeao.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoao Faitulafono, ia ou te lagona ua maua le malosi e faaopoopo e faaauau ai ia le tatou galuega.

E faia le malologa o lo o faapena ona maea le saunoaga a le Minisita mo le Soifua Maloloina, ma e tapa ma le faaaloalo lau Afioga i le Minisita mo Galuega, Felauaiga ma Atinae Eseese.

Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eseese): E fia faamauina le agaga faafetai i lau Afioga i le Fofoga o le Fono mo le avanoa, ae ua ou tulai atu ma le agaga faaaloalo e tali atu i mataupu sa laga mai e sui usufono mamalu.

Lau Afioga i le Fofoga Fatalai, ae ou te le i tali atu i saunoaga a sui usufono mamalu e muamua lava ona faatalofa atu ma faatulou atu i le pau o le Maota o sasao nei, le afio o lau Afioga a le Fofoga o le Fono, afio lau Afioga i le Palemia, aemaise lau Afioga i le Sui Palemia, afifio o Minisita o le Kapeneta ia ma afioga i Minisita Lagolago, ia liliu i lena itu o le vai, afifio o outou Afioga i Taitaifono o Komiti eseese faa-Palemene, aemaise le afifio o sui usufono mamalu uma o le Palemene.

Susu lau Susuga i le Failautusi o le Maota faapea le loaloa o le Pulega ma lau aufaigaluega, afifio Ofisa Sili o Pulega o Matagaluega ma Faalapotopotoga Tumaoti o le tatou Malo. Faatalofa atu foi ma faatulou atu i lau tapuaiga Samoa, mai i ona tumutumu mauga seia paia mauga iti. Afio lau Afioga i le Ao Mamalu o le Malo ma lau masiofo, afio lau Afioga i le Fono a Sui Tofia ma lou faletua, afio foi lau Afioga i le Sui Faamasino Sili, faapea le mamalu o le Ofisa o Faamasinoga, susu le aufaigaluega Paia a le Atua, mai ona fata fataulaga e fia o lo o faafalelemalu i nuu ma afioga ma nono manu aua se manua o Samoa ma ona tagata aemaise ai se manua o lo tatou Palemene.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Ou te fia faatalofa faapitoa atu i le paia ma le mamalu o si ou itumalo, o le Nofoa Tu Taulaga Sasae, malo le soifua manuia malo le tapuai, malo foi le tatalo. O outou sa ma faigata i ona tulaga faalupeina, o outou paia faale Atua paia faale atunu paia faalemalu, o le a nuunuu atu faatin-i-o-tausala, tulou, tulou, tulouna lava.

Lau Afioga i le Fofoga Fetalai, e fia faamauina le agaga faafetai i lau Afioga i le Minisita o Tupe, faapea le Alii Pule, faapea le Pulega ma le loaloa o le aufaigaluega mo le Tala Faaopoopo Nu.2 o le Tupe 2018/2019, ia ma le Tala Faatatau Autu o le Tupe 2019/2020, malo le galulue, malo le tapena.

E fia faamauina foi le faafetai i le Taitafono, sui mamalu o le Komiti o Tupe a le Palemene, mo le tou lipoti, aemaise ai ni fautuaga taua o lo o tuuina mai i le tou lipoti.

Lau Afioga i le Fofoga o le Fono, o le tele lava o saunoaga a sui usufono mamalu sa talosagaina ai auala galue, moli auala, taligalu, auala sima, suavai taumafa, faapea se tasi o uafu i le afioaga lea o Manono. O le tulaga o le uafu lea lau Afioga i le Fofoga o le Fono, sa i ai le matou asiasiga i se taimi o le tausaga ua tuanai sa asiasi ai le faaopoopoina o le uafu lea i Manono-tai. Ma sa matauina ai le faaletonu o le tulaga lea e i ai le uafu lea i Manono-uta, ona ua le saogalemu mo le mamalu o le atunu, aemaise foi le itumalo, aemaise foi tagata tafafao mai fafo po o turisi. O lo o faaaogaina pea lenei uafu, ma o le tulaga lena ua i ai ua le o toe saogalemu, o lea ua faamauina uma ia a outou talosaga, ma o le a tapena atu se matou asiasiga, pe a maea ia le tatou Fono e asiasiina ma faamaonia ai a outou talosaga.

Ia o le faaupuga foi lea o le taatia mai lea na suia e le Minisita mo le Soifua Maloloina, e palalau mai, a o lau la faaupuga, ia lafolafo faatatau mai, fuafua mai, ia leaga e tele galuega, a e le o lava ia tatou seleni e faatinoina ai ia tatou galuega tetele a le Malo. Ia lafolafo mai la ma fuafua mai i le tatou seleni lea na faailoa atu i le Tala o le Tupe.

Ua maea foi ona pasia e le Kabeneta ise suiga mo le faalelei o tatou auala, public roads, lea sa saunoa ai le sui usufono mamalu, ua beyond maintenance po o irreparable ua le mafai ona toe faaleleiina. Ma ua fautuaina ai le LTA ina ia suesue uma tulaga o conditions ua i ai a tatou public roads ma reconstruct ia vaega o auala ia ua beyond maintenance. O lea suiga o le a faasaoina ai tupe a le Malo, ma le faaaauauina o galuega tau repairs and maintenance ae reconstruct vaega o public roads ia ua faaletonu e le gata o le a umi atu se taimi o lelei ia auala, ma o le a faasaoina ai se tupe tele, a le tatou Malo mai le faaaauauina pea o galuega ia tau repairs and maintenance, ae ua mautinoa e le toe foi ia vaega o tatou auala i se tulaga lelei.

A silasila lau Afioga i le Fofoga o le Fono ma le paia o le Maota i auala faalava lea i Aleisa ma le agai atu i Leulumoega, lea ua maea ona toe reconstruct, ma o se ata faataitai lea o le suiga lea o le a faalelei ai tulaga o tatou public roads.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Sa lagolago tele mai le Minisita mo Turisi ma Tagata Tafafao mai Fafo le Afioga lea ia Sala Fata Pinati, i le faatinoina la lea o le suiga lea, ona o Sala foi lea o le sui usufono faaolioli lea mo le itumalo o Aleisa, lea o le a tapena mo le faigapalota 2021. Ia e le o se campaign ae o galuega o lea e faatino i le afioaga o Aleisa.

O lo o fuafua foi le... lau Afioga sa laga mai foi e se sui mamalu le tulaga o le tuufaatasia o aoga mo alii vaa po o seila a le NUS ma le Kamupani Vaa SSC. O lea ua maea le galuega sa faatino e se Soa Komiti *Task Force* sa tofia e le Kapaneta mo se alii Konesale mai le *World Maritime University*, ma o lea ua tuuina mai le lipoti a le konesale, faatasi ai ma fautuaga e silasila i ai le Task Force o le Soa Komiti, mo lona faatinoina ma toe lipoti atu ai i le Kapaneta. O lo o fuafua nei e le Kamupani Vaa SSC, se isi a tatou vaa e pei o le Lady Samoa III, e faaleleia atili ai auaunaga mo femalagaiga i le va o Mulifanua ma Salelologa, e tapena ai mo le Faiga Palota Tele i le 2021.

Lau Afioga i le Fofoga Fetalai, ou te fiafia tele e faaaogaina lenei avanoa e faailoa ai i sui usufono mamalu o le Palemene, le fesoasoani mai i le Malo o Iapani mo se grant e \$23 miliona Amerika, mo le fausiaina o se vaa fou, e sui ai le Lady Naomi lea ua ova i le 20 tausaga le matua, ma ua talafeagai lava ona sui ona ua fai ma faaletonu le Lady Naomi i le tele o taimi ma aafia ai faigamalaga mo Amerika Samoa.

Sa afea foi i saunoaga a sui usufono mamalu ia le uafu i Asau, o le ua toe faatino *surveys* a le SPA po o le *Samoa Port Authority*, mo le toe faaleleiina o le channel lea e ulufale mai ai i totonu vaa ona o lo o poloka e se amumaa. Ia lau Afioga i le Fofoga Fetalai, a maea lea suesuega ona maua ai lea o ni masini talafeagai faaneionapo, e talepe ai le amumaa tulou lea e poloka ai ia le channel. Ae e le o le pakete ma le filifili lea sa saunoa ai se sui usufono mamalu.

Lau Afioga i le Fofoga Fetalai sa lagalaga finagalo o nisi o sui usufono mamalu i ni fesuiaiga i nisi o auaunaga a le Pulega o Felauaiga i le Laueelele LTA, ma le Matagaluega o Leoleo. Ia ua maea ona tali manino le Afioga i le Palemia i mataupu sa laga mai e sui usufono mamalu. Ia ma le isi lau Afioga i le Fofoga o le Fono, ua faataatia nei i lumamea i le laulauafono le Teuteuga o le Tulafono Autu o le LTA ma le Ministry of Police e aafia ai fesuiaiga ia sa fesiligia e sui usufono mamalu, ma ou te manatu o le a le toe afea i sau faamatalaga.

Lau Afioga i le Fofoga Fetalai o nisi o tatou galuega tetele o lo o faatino i le taimi nei, mo lou silafia aemaise sui usufono mamalu uma o le Palemene, o le tatou galuega lea i le Vaisigano Bridge, o lo o faatupe e se *grant* e \$43 miliona mai le Malo o Iapani e auala mai i le JICA. E maea lea galuega ia Iulai 2020, o le auala taavale lea sa fesiligia e se sui usufono mamalu, e amata mai i le auala sima, e taulai mai i luma o le Ioane Viliamu Building i Tamaligi.

O le isi galuega tele o le *Bailey Bridge* lea i le Loto Samasoni o lo o faagasolo nei lau Afioga e faatupe e Ausetalia i se tau e \$858,000 Ausetalia, ia ma o le faamoemoe foi o lea galuega e maea nei i le amataga po o le ogatotonu o Iulai.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O tatou auala laupapa po o le auala sima lea i Maliolio, sa faatupe e le World Bank ma Ausetalia, i le Programme foi lea o le *IRRAP* \$8.6 miliona le tau o le galuega lea, ma e maea nei ia Tesema o le tausaga nei.

O le tatou auala lea e agai i le West Coast Road e agai i le malaevaalele, o le Phase 1 lea ua galueina i le taimi nei, e amata mai Saina e tau i Malua, e faatupe la e le World Bank le galuega lea e \$38.5 miliona, ma o lea galuega e faamoemoe e maea ia Aokuso 2020. O le Phase 2 lau Afioga o le vaega lea o le auala mai Malua e agai i le malaevaalele i Faleolo o le a tapena faatalanoaga ia Tesema 2019.

Lau Afioga i le Fofoga Fetalai, o le tali atu lea i mataupu, ma le isi lau Afioga ua galo ia te au, o le tapenaga o tatou auala ia e faagasolo nei i le LTA i le tapenaga o taaloga a le Pasefika, masalo o lena ua silasila ma tagatagai i ai ia outou afioga i sui usufono mamalu i le galuega lea, ma o nei uma galuega e tapena ina ia manaia ma lelei ia tatou auala lea e agai atu i le malaetaalo ma o lea o le a e faagasolo i le taimi nei le galuega lea.

Ia lau Afioga o le tali atu lea i mataupu sa laga mai i saunoaga a sui usufono mamalu, ma ua maea ai foi i i lau folasaga.

Tofa Lealalepule Rimoni Aiafi (Faleata Sisifo): Lau Afioga i le Fofoga Fetalai...

FOFOGA FETALAI: Malie le Minisita o lo o tulai mai le sui usufono o Faleata i Sisifo, tulai mai le sui usufono.

Tofa Lealalepule Rimoni Aiafi: Ia faafetai lava, e na o sina mea laitiiti lea lau Afioga, sa ou faalogologo i le saunoaga a le Afioga i le Minisita o Tupe i le taeao, e fua tatou galuega faatino i ai latou o faaaogaina ma le toatele o latou o aumau i lea vaega o le atunu.

Lau Afioga leaga o lea ua e see ese, o le auala lea i Faleauniu, se i saunoa sao mai lau Afioga aua o lea ua faaselau ona faamanatu atu i lau Afioga, ou te alofa foi ia te oe aua e uma le paeaiga lenei o faamanatu pea faamanatu pea, ae alofagia se i fai mai sau saunoaga ua tele le mafatia ma le toatele o Samoa lea e nonofo i le mea lea, faamolemole lava.

Ia ma le isi mea le tatou paoa lea na ou talanoa i ai, ua tupu soo lenei mea e le masani ai, pe soo pe soo, se i fai sau saunoaga faamolemole aua o le mea sa fai feeder le mea, a o lea la sa i ai le talitonuga e tasi le mea e alu i ai, aua sa manaia aso ia a pe le isi pitonuu ae ola a le isi pitonuu. Sa i ai le feeder e ola ai le falemai e le mafai ona faalavelavea, ma le feeder a le taulaga a o lea e pei a pe nei se mea i inei ae aafia ai Samoa atoa. Sa le masani ona tulai mai. Ma le faaaloalo lava. Faafetai.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

FOFOGA FETALAI: Malie le Minisita se i tuu atu i le isi faaui lavaea lea ona e saunoa a lea e kava uma ai. Tulai mai le sui usufono mo Safata Sisifo.

Afioga Leaana Ronnie Posini (Safata Sisifo): Faafetai i lau Afioga i le Fofoga Fetalai. Faafetai tele lava i le saunoaga malamalam a lau Afioga i le Minisita. E tasi a si mea lea sa taua i lau lauga faamolemole lau Afioga i le Minisita, o mea ia o pili o vai, pili vai mo aoga. Aua o lea e matau e lua ituaiga pili, o le pili foi lea e alu i luga o pisinisi ma pili o aiga taitasi. A o lea e matau lau Afioga, o le pili lea e faaaoga e aoga faamolemole o le pili o le vai o lea e faaaoga i pisinisi foi ia. O le talosaga lau Afioga, pe le silasila ifo i ai lau Afioga i le Minisita pe le tuu i lalo i le vaega lea mo aiga taitasi. Ma le agaga faaaloalo.

Susuga Hon PAPALIITELE NIKO LEE HANG: Faafetai i le sui usufono mamalu sa faaui lavaea i le folasaga, ae o le mataupu lea sa laga mai e le Afioga ia Lealailepule, o le auala lea i Falelauniu o la ua i lalo o le polokalame mo auala faaleleia. O le isi auala lea lau Afioga e matau e le toe manaomia ni repairs and maintenance, e tatau ona reconstruct. Ia o lea la ou te tapena atu ai ona o lea foi na saunoa le Afioga i le Minisita o Tupe, ave le faamuamua i auala ia e i ai faleaoga. E pei o le tulaga lena, a o le auala ia o le afioaga lea, e sao le sui usufono mamalu, ua leva ona tatalo mai i le tulaga o le leaga o le auala lea ma ua faamaonia foi. Ia onosai mai, lafolafo mai ae aua le taatia mai aua a taatia mai, e leai se mea e faia. Malo le taulagalaga.

O le tulaga i mea ia a le EPC o le pe soo o le power. O le faalavelave o lea faatoa e lauga mai i le mataupu lea ae le i suesue i totonu po o le a le mafuaaga, ae sa pe nei foi le power i uta i le matou nuu i Vailima. O le faamatalaaga a le EPC e i ai lava mea la e faaletonu i le fesootaiga mai Alaoa i Tanugamanono ma o la ua toe faaleleia. E le i leaga la le laina lea e alu i luga i Vailima, a o le puipuiga o le saogalemu e tape ai la le feeder lena e agai atu i luga ae se i faaauau le latou galuega. O lea la ua lelei ua maea ona toe faalelei.

O le mataupu lea i le suavai, o lea ua faamauina le talosaga a le Afioga i le sui usufono. Ma o le taua foi la o le manatu lea, e i ai foi lou talitonuga, e tatau ona ese le pili e charge ai aoga. O le fautuaga taatia mai ma lafolafo mai se i talanoa matou ma le SWA po o le a se faiga e fai ai se suiga, leaga o lea ua alu tutusa lava private ma le tulaga o aoga. O lea la ua tuu ese lava commercial ia aua o latou e tele tupe, ae lavea foi la aoga i le tulaga lea e te saunoa i ai, a o lea o le a lafolafo mai se i fai i ai se faaiuga a le Pulega o le Suavai.

Masalo lau Afioga ua maea ai i i mataupu sa lagalaga mai i saunoaga a sui usufono, a o le tatalo lau Afioga, ia faamanuia le Atua i lau Afioga....

Afioga Sulamanaia Fetaiai Tauiliili Tuvivasa (Vaimauga Sasa): Lau Afioga i le Fofoga Fetalai, ona o lea o le a maea mai le saunoaga a le Minisita, e i ai sina mea laitiiti lava e fia faamanatu pe maua se avanoa o lenei itumalo.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

FOFOGA FETALAI: Sa saunoa le sui usufono lea i se mataupu tau i lau Matagaluega pe leai?

Susuga Hon PAPALIITELE NIKO LEE HANG: I, e tau galo ae pei na saunoa i lana auala.

FOFOGA FETALAI: Ia, leaga o lea... ia se i tulai mai la le sui usufono.

Afioga Sulamanaia Fetaiai Tauiliili Tuivasa: Lau Afioga e le toe oo se manatu o lenei itumalo i matou auala o lena ua leva ona i ina talosaga mai le taimi na ulufale ai le sui usufono lenei e oo mai lava i le taimi lenei e leai se mea o faia. Ae ua ou tulai ona o le taligalu faamolemole, o le Afioga i le Minisita o le Siosiomaga aemaise foi o le Palemia e afio mai le itu lea, se i silasila ane i le maaleale o le tulaga ua i ai le nuu lea o Laulii, lea foi na avatu ai le talosaga i le taligalu faamolemole, pe le i sislasila ane, pei ona ou fai atu o le afioaga lea o matou e leai se aau, o le ava atoa le mea e fafati ai galu. A outou silasila i le siisii o le tau lea ua i ai nei ma le tulaga ua i ai le tatou... ua toeitiiti lava fafati galu i tua o maota ma laoa. E pei o le agaga lea pe le mafai ona faamuamua ane le taligalu o si ou nuu lea ona o lou manumanuga i tagata soifua, e moni lava o auala pe a, ae mafai lava ona o i luga o le maomoomo ma le malepe la e i ai, a o le soifua aua e popole i le taimi o le po, i momoe momoe ma tofafa le afioaga, ae feala ifo ua leai se mea ua fafati lava le galu ma uma atu ai le soifua o lou itumalo.

E pei o le agaga lea i le taligalu i Laulii, pe mafai ona silasila ane lau Afioga ua leva ona tuuina atu lenei talosaga, ae ua e vaai i ai ua matuai malepe lava le taligalu o lou afioaga. E pei o le agaga lena i lau Afioga i le Fofoga Fetalai. Ma lou faaaloalo.

FOFOGA FETALAI: Ia, se i tulai mai le Afioga i le Minisita, e pei lava e sao le sui usufono mo Vaimauga Sasae.

Susuga Hon PAPALIITELE NIKO LEE HANG: Lau Afioga i le Fofoga Fetalai, o lea foi e taua mai e le sui usufono mamaulu le MNRE. Ua ou le malamalamala la po o fea tonu na ave i ai le talosaga. A o lou malamalamamaaga i mea ia o taligalu lau Afioga, o taligalu ia e aafia ai aualatetele, o mea na a le LTA. A o taligalu ia e aafia ai afioaga i totonu ma vaitafe se i tulou, o le Matagaluega lena a le MNRE, ae se i taatia mai, lafolafo mai se i toe tagai i ai le LTA, a vaai atu foi le LTA e le o se galuega tau ia latou, ia o le a refer loa lea i le MNRE. Ae leaga o lea e pei e tau fou mai lau talosaga faapea ua leva, a o le taimi lava na ou i o i le Matagaluega o Galuega, ou te le i vaai a i se tou talosaga, na o auala lea e avatu ai le tou talosaga. A faapea e sese, ia lafolafo mai se i toe vaavaai i ai le Matagaluega ona toe tagai lea i ai.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O lea foi na taua i lau tali faalauaitele, o mea uma ia o taligalu e aafia foi i asiasiga ia o le a faatino e le Matagaluega o le LTA, ma atonu o le a maua atu ai i ina lau talosaga ua leva ona taatia mai. Ae o le a silasila i ai le Matagaluega ma le Pulega i le tulaga lea.

Lau Afioga i le Fofoga Fetalai, ia saga faamanua le Atua i lau Afioga i lou soifua maloloina ma ia faafualeva lou soifua laulelei aua lou faatautaiga o Fonotaga a le tatou Palemene. Ia alofagia foi e le Atua lau Afioga i le Palemia, lau Afioga i le Sui Palemia, ia maua pea lo ouluu soifua manuia aua tiute ma galuega fita o feagai ma a ouluu Afioga i le taitaiga o le tatou Faigamalo. Ia faamanua mai foi le Atua i Afioga i Minisita Lagolago aemaise foi le paia ma le mamalu o le Palemene. Ia, le loaloa o Ofisa Sili o Pulega o Matagaluega ma Faalapotopotoga Tumaoti a le Malo faapea lau Afioga i le Failautusi o le Maota, ia faapena foi ona faamanua le Atua i o outou tiute ma galuega o feagai ma a outou Afioga.

E faapea le tapuaiga a si ou itumalo palota, Nuu Tu Taulaga i Sasae, ia agalelei le Atua ia faamanua pea tupu ma ee aemaise le paia ma le mamalu i alii ma faipule o le tatou afioaga.

E tasi lava si mea lea lau Afioga i le Fofoga Fetalai, masalo ua outou silasila ane i tatou auala ia ua teuteu i laau foi ma fua. E tele afioaga lea ua faatinoina lea tulaga ona o le tapenaga foi i tatou taligamalo i taaloga a le Pasefika e faapena foi la luga ia matou. A outou malaga i luga i le auala foi lea o le Cross Island Road, ona outou tagai lea i le matagofie. A o lau tuualalo lau Afioga i sui usufono mamalu o le Palemene, a faapea o i ai ni mea faapea i o outou afioaga, se faamolemole fai faalelei, ia matua faasala lava tupulaga ia e o atu toe faaleaga. Ae ia teuteu faamanai a le tatou atunuua aua tatou taligamalo. O se tuualalo lea lau Afioga aua foi le faafogafoga mai a sui usufono mamalu o le Palemene pe a faapea ua teuteu o latou afioaga. Ma lou faaaloalo lava. Ia manuia le Fono.

FOFOGA FETALAI: Malo faafetai saunoa i lau Afioga i le Minisita mo Galuega, Felauaiga ma Atinae Esese. Faafetai.

Ia, ua oo mai le faasologa i lau Afioga i le Minisita mo Tagata Tafafao Maimoa Mai Fafo.

Afioga Hon SALA FATA LISATI PINATI (Minisita mo Tagata Tafafao Maimoa Mai Fafo): Ou te muai faafetai ma momoli atu le faamalo i lau Afioga i le Fofoga Fetalai. Ou te ofo alofa atu foi i lau Afioga i le Palemia, le Afioga i le Tamaitai Sui Palemia ma le mamalu o le Kapaneta, sui usufono tofia o le atunuua, ae faapea foi Minisita Lagolago.

E faafeiloai atu foi i Ofisa Sili o Pulega o Matagaluega, ae a Samoa o lo o faafogafoga mai i le tapuaiga o le Fonousu a Samoa o lo o faapea ona tatou talanoaina le manuia o Samoa i lenei taeao. O le atoaga o le tautalaga i lenei taeao, ou te faia le upu foi lele pe a faatauto tatou, I speak the truth, the whole truth and nothing but the truth. So help me God. O le tautinoga lena a lenei sui usufono vaeatu le paia ua sasao mai nei.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E manatu o le tele o saunoaga pei ona saunoa le Taitai i se taimi ua mavae atu, sa atoa i i lafolafoga ma le saunoaga a le Taitai tu ma aga o lo o faapena ona agai i ai le tatou Faigamalo i le faalauleleia ma le faailoa atu o Samoa i le lalolagi atoa. Ma ou te manatu foi o le a le toe asa le ogasami lea, o lena ua i fale le matega, o lea foi o le a oo mai taaloga a le Pasefika. O lea foi sa saunoa lo tatou Taitai i le Atu Caribbean faapea ma atunu i fafo, o lea o le a oo mai ai i Samoa nei le Fonotele a Malo eseese, pe a ma le afe ma ona tupu atunu eseese o le a faapea ona autovaa mai i Samoa e avea le fua o Samoa i fonotaga tetele, o le a faapena ona tau ai Samoa i le isi selau tausaga, o le Samoa pathway le auala e tau ai le suafa o Samoa. Ia, o se mitamitaga tele lea e avatu ai le faamalo ma le faafetai. Tatou faafetaia le Atua i lana pule faasoa ua tatou aulia mai lenei vaitau, a o lo o i ai se Taitai o lo o faatinoa galuega mo Samoa. Ou te le selu atu i le Palemia ma le Malo, a foi o le tatou galuega lea, o le galuega a tatou uma lava, o e uma ua filifilia mai itumalo taitasi, o le sao lea o tatou, o le tatou galulue. Ia o le a lava le mea e pau ai le isi sui usufono po o le Kapaneta foi, o a ni mea tou te silafia e aoga, o uiga ia o le soifuaga, o le aiga e tasi tatou, e eseese afioaga, eseese nuu o lo o faapea ona tofia mai ai tatou, ae auga e tasi, o le tatou tautua tuavae lea aua le manuia o Samoa. Ma e momoli atu ai le agaga faafetai.

E le tele ni fesili na agai mai i le auauanga lea faa-turisi, ae o le a taumafai e otooto atu, e puupuu lava le tali, masalo e lima minute ua maea atu foi. E le toe po malae i le tulaga ua i ai le atinae o Samoa. O le mea moni lava o le faamamafa a le Malo o lo o ave i i. Ma e atagia i i le aofaiga o e o lo o asiasi mai i Samoa nei. O le aofaiga o le au asiasi mai i le tausaga na mavae nei, e 172,496. O le Oceania alone a ia e i ai Amerika Samoa, Fiti, Cook Islands, isi motu o le Pasefika atoa ai ma Niu Sila ma Ausetalia, o le aofaiga o le latou... e 141,000 le aofaiga o i latou na omai i i. O Europa e 7,125 le aofai. O Amerika e 14,419 le aofai o tagata, o Asia e 7,836, o le aotelega la, e maua ai le 172,496 e sa asiasi mai i Samoa. Na fesiligia e se tasi o sui usufono, ia le vaevaega o i latou na autovaa mai ma asiasi mai. O i latou sa asiasi mai e holiday, e 49,000 le aofai. O i latou i luga o pisinisi ma conferences ia e fai e 7,677. O a tatou paaga masani o aiga e asiasi mai e 66,849. O mea tau sports e 1,084 le aofai. O tagata e afe mai ae toe toesea i le transit e 4,848, le aofaiga lea o i latou o lo o faapea ona taunuu mai i le tausaga ua mavae. Ma o le aofai la o se seleni ua maua mai i faamaumauga lea e i.

I le tausaga e 2018, e \$493,800,000 le aofai o le tupe sa maua mai i turisi. I le tausaga e 2017 e \$425,800,000 le tinoitupe na maua. O lona uiga e \$68 miliona le tupe faaopoopo na maua mai i tausaga ia, le tatou tala i tupe maua.

O lea e momoli atu ai le agaga faafetai ia tatou paaga mai fafo, o aiga, uo, faapea foi e asiasi mai ua latou avea Samoa ma atunu e asiasi mai ai, aemaise lava o tatou aiga. Ua lau silafia foi e lo tatou atunu, ua tele o tatou faalavelave, o maliu, o faaipoipoga, e faapena lava ona asiasi mai o tatou tagata.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O fuafuaga foi a lo tatou Malo o lo o faataatitia nei, e le na o le pau lea o se vaega o lo o faapea ona faamamafa i ai. E taua e nisi faletalimalo, ua aafia o latou faletalimalo sa lauga i ai sui usufono mai... faapea ua matagi i galu, o lena ua avatu se lagona, tatou talanoaina lea vaega. O lo o i ai lava le avanoa e tatala e mafai ai ona tatou talatalanoa, ia tatou taunuuu ai i se taunuuga e faamalie ai itu uma e lua. O le agaga ia e avatu le fesoasoani i le alagatatau ma le mea e tatau ona faatino. O le faalauiolaina foi o Samoa, e i ai alaleo esese o lo o faapena ona faaaoga i nei onapo. Saunoa foi le Minisita o Fesootaiga, e i ai website ma o i ina i website ia, ia i latou ia e fai faletalimalo, e ao foi ia i latou ona open up a latou websites e tagai foi i ai e o lo o fia asiasi mai. O le taua o ia vaega ou te iloa o le success o faletalimalo e depend i luga o lau website. O le mea foi lele e te faalauiola atu oe, o a mea e mafai ona faatino e le faletalimalo, o le a le taumafa, o le a le room rate, po o le tupe Samoa po o le tupe Saina po o le tupe foi a Amerika. Ae peitai ane o le tulaga lea e i ai, ua lausilafia foi o le tele lava o room rates lea e i ai e faaaoga le tupe mai Amerika.

Ou te le o iloa po o le a le mafuaaga e leai sau faletalimalo. Ae o le pisinisi lenei o faletalimalo, ou te faafetai foi ia i latou o lo o feagai ma lea galuega, o se galuega e tele le luitau, e tele le fatu o le tagata na te faatuina le galuega lenei, aua e le taugofie. O le valuation foi po o le fluctuation o lea tupe i le aso i lea aso e depend foi i ai mea e faaalu o le faletalimalo. O tagata asiasi mai, e fai foi o le manao, ae fai foi le latou filifili, o le filifili po o fea le faletalimalo e agai i ai. Pe budget, po o le vaega foi lele le isi.....le tau e o i ai le au maumea po o le ogatotonu foi. O i ina la e depend i luga o le tagata asiasi mai. Ae pei ona saunoa se tasi o sui usufono o le lau fofoga fiafia lava e taulia. O i a ta alu atu i se fale e ese foliga e faaali mai, se i tulou lava, e i ai lava le fuaitau a Samoa, pe mata u ea. Po o le tagata lava ia i le fialoa ma le le faia lelei o tagata faigaluega.

O le siitia atoatoa o galuega tau turisi, o lea ua i ai le aoaoga. E tolu aoaoga ua agai i Savaii ia i latou e aotauina ai o tatou tagata i le service. O tu ma aga e tatau ona faatino i totonus o faletalimalo, e faapea foi i Upolu nei, e lua mo Upolu nei. O lea e taua faapea, o mea e lelei mo Upolu e lelei foi mo Savaii. E moni lelei, o le ala foi lea o lea e taumafai ai o lo tatou Malo e toe resume a tatou vaalele e agai i Asau ma Maota. O lo o i ai pea e o lo o faapena ona manaomia le auaunaga. O le a faapea ona toe taumafai e faalelei atili ia vaega o le auaunaga, aemaise foi turisi o lo o faapena ona faimalaga mai, e mafai ona latou afea lea vaega i le tupe, aua o le tala lava o le tupe e taua.

O le faafetai atili e fia ave lea ia Niu Sila ma Ausetalia, ua i ai se vaega tele o se seleni ua ofo mai e Niu Sila, ua outou silafia foi ia le tulaga lea ua i ai le waterfront, e le o toe mamao ae maea le galuega matagofie. E ui lava ina faapea o la e i ai laau ua faapena ona toto, e ao ona toe liai i luga ae aveese ae tuu i ai laau lelei. Ae tatou talosia ia ola lelei, ona faasoasoa atu ai lea e tatou laau lelei e toe nonofo tatou sui ina ia matagofie atili ai le tatou taulaga. Ao le faafetai, o lena ua avatu i le malo o Niu Sila. O le Tosua o lo o ua i ai le faafanua o le a faapena ona faaleleiia.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O le Sopoaga falls i Lotofaga, ma Lanutoo ma Afuaau. O le Lava field i Saleaula ma Aopo i le auala savali i Umamoa.

Lau Afioga i le sui Fofoga Fetalai, na e saunoa faapea o le mataaga lea i le Swimming with the turtles, ou te fia oo atu i ai, ou te fia auau ma au laumei, afai o le a le ituaga tulaga e i ai, pe faataga na o atu ma ofu bikini foi lele e tietie i le laumei ae... o tulaga uma ia. A o le faamamaina ma le tulaga lea, o le a taatia atu lau Afioga.

O lo o i ai se faafitauli o lo o tulai mai, ou te manatu o le a ou le fofolaina atu i luma o le Maota, leaga e lelei lava tau o oe ma au, e faailoa atu ai. Ou te musu e faalauiola i luma o Samoa o la e faafogaga Samoa, ae o le a sou finagalo, o la e i ai le ofisa ta te talanoa ai, ona faapena lea ona faatino uma mea e pei ona e saunoa i ai.

Lau Afioga i le Fofoga Fetalai, leaga o oe e tele au pasi, ae a taunuui foi le vaa mai fafo, ou te molimauna lava, e ao ona avatua nisi lava taavale, ua lava a na o taavale a lau Afioga e faaaoga. Ua maea se faamatalaga a au nei. Ae faamanuia mai le Atua i le Maota Fono a Samoa.

Tofa Nafoitoa Talaimanu Ketí (Gagaemauga Nu.3): Lau Afioga i le Fofoga Fetalaií

FOFOGA FETALAI: Malie lau Afioga i le Minisita se i tulai mai le sui Fofoga Fetalai.

Tofa Nafoitoa Talaimanu Ketí: Ua manatu lava e le faalavelave i le saunoaga matagofie, o le saunoaga faatama a lau Afioga i le Minisita o Tagata Tafafao Maimoa mai Fafo. Ae ua ou manatu o lea ua e taua le mataaga lea i Satoalepai i lou itumalo, ia faafetai o lea e i ai le lagona o lau Afioga aua le toe faamatagofieina. E moni lava au, a ua maea ona teuteu le mea lea e te tau saunoa i ai.

Ae o le agaga o le manatu na tuuina atu i le taimi ua sola, e agai i le auala e le agai i le mataaga ae agai i le auala e oo ai i le mataaga. O le agaga maualuga lena na tuuina atu ai le talosaga. E le i afea lava le mea lea e saunoa i ai lau Afioga, ae o le agaga sa faaauala atu i le Minisita o Galuega, o le oo i le mataaga, auala ina ia faamatagofieina o lo o faaletonu lava i le taimi nei. E pei o le agaga lea e na ona tuutuu atu i ou tafatafa. Ae faafetai i lau Afioga o lea ua e saunoa, o lo o i ai foi le faatuatuaga i lo matou nuu aua lona faaleleiina. Ae o le auala sa taumafai atu ai se lagona o lenei itumalo ma le faaaloalo.

FOFOGA FETALAI: Se i toe tulai mai le Minisita.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Afioga Hon SALA FATA LISATI PINATI: Faafetai, se leaga le mea lelei o le talanoa atu o la e i ai uso i le isi pito. Ou te manatua lava le ta vaega a o ta i ai i uta i le Matagaluega o Leoleo, o le ma kegi lea. E tasi lea au tama lelei sa ma tutu mai. Lau Afioga, o le a le mea e te atugalu ai? E te atugalu o lea ou te tulai atu i i. A ua e... listen, I speak the truth, aua la e te popole, aua e te popole i se mea tasi. Lau Afioga ua maea i i se faamatalaga, soifua.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, faamolemole lau Afioga ona o le vaega lea e taua, e na ona faamanino i le Afioga i le Minisita. o lea ua maea...

FOFOGA FETALAI: O ai le Minisita e te fia saunoa i ai, o lea ua maea ona....

Afioga Fuimaono Teo Samuelu Teo: Ona o au ou te asiasi tele i Savaii ma ou asia le mataaga lea, ona o le talosaga a le Minisita foi lele pe mafai ona aauai ai ma laumei ma tietie ai. Leai o le talosaga, o au e le mafai ona aauai se isi, e ese lava le mea e i ai le vaega lea o laumei. A o le talosaga e tietie ai, ou te faamanatu atu i le sui usufono, se i alolofa i nai meaola leaga e afaina ai. E le mafai ona tietie ai se isi i laumei. Ma lou faaaloalo lava.

FOFOGA FETALAI: Ia, e pule lava lau Afioga pe te tali i i pe te tali i tuafale i le taimi e inu ai le tatou ti.

Afioga Hon SALA FATA LISATI PINATI: O le uso lea ia Fuimaono, o le isi lea uso tuofe o au. O le fai luau lela, e le i tofo le Palemia i lau luau foi lele e ave i ai le tipolo ma le lupe foi lele ma le moa lea e tunu. Oka oka sole. Fai mai le mea a le toeaina o le matou nuu, öOka oka Asita.ö

E leai, ou te le i fai atu ou te tietie ai, na ou fai atu, öI swim with the turtles.ö

FOFOGA FETALAI: Malo. Ua manino le tulaga o le saunoaga a le Minisita, saunoa faa-Minisita o le Kapaneta, saunoa foi faa-tama o le Palemene e talifuaitau i mea sa laga e sui usufono mamalu. Malo faafetai saunoa Sala, faafetai lava.

Ia, ua oo mai nei le faasologa i le Minisita mo Tina ma Tamaitei, Atinae o Nuu ma Afioaga ma Agafesootai.

Afioga Hon TUITAMA TALALEI TUITAMA (Minisita mo Tina ma Tamaitei, Atinae o Nuu ma Afioaga ma Agafesootai): Ee ia i mauga o ao lau Afioga i le Fofoga Fetalai, ee foi i vaatapu le paia maualuga i le Afio o le Afioga i le Palemia faapea le Sui Palemia, le Aiga Kapaneta ma Minisita Lagolago.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E faapea foi ona ee i fatelele le paia o lena Itu o le Maota i le paia ma le mamalu o sui usufono o le Fonousa a Samoa, ae tainane foi le Ofisa o le Fono o lo o lima ma vae e tautuaina le faagasologa o le tatou Fonotaga, ae a le tapuaiga a Ofisa Sili o Pulega o Matagaluega ma Faalapotopotoga a le Malo, o lo o i ai le malosiaga o le tatou Malo e tua i ai le tofa ma le faautautaga i totonu o le Maota nei.

Ae le faagaloina foi le tapuaiga a Lana Afioga Mamalu O Le Ao o le Malo, faapea le faafogofaga tapuai mai o le mamalu o lo tatou atunu, tupu ma ee faapea foi tootoouli ma le aufueloloa o Samoa. E le faagaloina foi le tapuaiga i si ou itumalo o Aana Alofi Nu.1 Sasae, faafetai i la outou tapuaiga, e faapea foi le aufai tatalo i tulimanu e fia o Samoa o lo o faanonomanu aua lo tatou alo i le tausiga ma le faufauina o Tulafono mo se manuia o Samoa mo lona agai i luma.

Lau Afioga i le Fofoga Fatalai, na o le toatolu lava sui usufono na afea lenei Matagaluega, ua uma la ona ou tali atu e tusa ai ma lo latou tulai mai, vagana ai mataupu na laga e nisi sui usufono e toalua, o lea ua uma ona matou talanoa ma o le a faaaauau le soalaupuleina o mataupu ia e fai sina ogaoga faatasi ma lau Matagaluega i lou ofisa i se taimi talafeagai.

Ae ua ou tulai atu lau Afioga i le Fofoga Fatalai e faaaoga lenei avanoa, e matauina foi ma le totoa, e anoanoai lava mataupu e feagai ma lenei Matagaluega, ona o le Matagaluega o Tina ma Tamaitai, Atinae o Nuu ma Afioaga ma Agafesootai, e fa Tulafono o lo o faafoeina ai ana matafaioi ma ana galuega fai. Muamua, o le Tulafono o le Matagaluega o Mataupu Tau Tina ma Tamaitai 1990. O lea Tulafono sa toe teuteuina i le 1998 ma toe faamalosia ai le tulaga i le Fono Faufautua a Tina ma Tamaitai. Na toe teuteuina foi i le 2009 ona o le faaofiina lea i ai o tofiga o Sui Tamaitai o Nuu. O le taimi nei lau Afioga i le Fofoga Fatalai, talu ai le faatinoga o lea vaega o le Tulafono i le 2009, ua 200 le aofai o Sui Tamaitai o lo o ua i ai nei.

Lona lua, o le Tulafono o le Saogalemu o Aiga 2013, o lo o aiaia ai i lea Tulafono sauaga ma soligatulafono i totonu o aiga. Mo le silafia, o aiga o lo o i ai nei i le tatou atunu po o households, e tusa lea ma le 28,880. O ia aiga uma o lo o i ai i totonu o le Tulafono lea i sauaga eseese faapea foi ma faasalaga faaeeina atu ona o ia soligatulafono. E 22,000 aiga i totonu o Upolu ma le 6,000 i Salafai.

O le Tulafono lona tolu o le Tulafono lea o Fono a Nuu 1990 sa teuteuina i le 2017 ma o lea Tulafono o lo o aiaia ai faiga faavae faapea iugafono a nuu taitasi faatasi ma le faaeeina atu o le malosiaga e faaeeina atu ai faasalaga e tusa ai ma ia Tulafono. E 185 nuu mavae o lo o i ai nei i Samoa, a o le aofaiga faatasi o nuu e aofia ai ma nuu mavae e 337. O ia foi la afioaga o lo o i lalo uma o le Tulafono o lo o tausia e lenei Matagaluega.

Lona fa o Tulafono lau Afioga, o le Tulafono lea o Mataupu tau Lotoifale 1995 lea na toe teuteuina i le 2010 ina ia suia ai le faalupega o le pulenuu e avea ai ma Sui o le Nuu ae le toe faaaogaina le Pulenuu faatasi ai la ma Sui o le Malo. Mo le silafia e lenei maota, e 211 Sui o le Nuu o lo o i ai nei ae 42 Sui o le Malo o lo o faatinoina lenei galuega.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E matauina ma le totoa i finagalo o lea sa afea le Matagaluega ma faaalua, e tele a se galuega o manaomia mo le faaleleia atili o le auaunaga i Sui o Nuu ma Sui o le Malo i nuu i tua. Ma o lea ua i ai foi se manatu, o le a faatalatalanoa ma le Matagaluega, tusa i totonu o le Tulafono, e 16 a tiute faatino o le pulenuu e galue ai i totonu o nuu taitasi, a o le tele o mataupu ia e oo mai i le Matagaluega, o luga lava o mataupu ia. E i ai foi la mataupu ia sa afea e sui usufono i le aso e faasino lava i le faatinoga o tiute o le pulenuu. Ona manatu ai lea, a feiloai le Matagaluega ae o le a tilotilo i tulaga ia pe tatau ona faatino ni workshops e faamanino atili ai i pulenuu a latou matafaioi ma tiute tauave i totonu o nuu, faatasai ai ma le tusia, faamaumau o sina tamai tusi e faamanino ai a latou matafaioi ma tiute ina ia malamalamana lelei Sui o Nuu i a latou galuega faatino e tusa ona manaomia i lalo o le Tulafono.

Ma le Tulafono mulimuli, o le Tulafono Faatonutonu lea o Mea a Samoa faa-Anamua, lea o lo o aiaia ai le tatou ie Samoa. O le 2013 na fausia ai lea Tulafono Faatonutonu e faavae i luga o le Tulafono o Mea Samoa Anamua 1954. Ma i le taimi nei, o lo o aiaia ai i totonu o le Tulafono lea le tele o le ie Samoa, e pei ona silafia e 12 aga le umi, 9 aga le lautele, o le tosi tasi, tosi lua, tosi tolu. O le uiga o lena faaupuga, o le tosi tasi, e 1milimita le mafafia o le tosi, tosi lua e 2milimita, tosi tolu e 3milimita le lautele o le tosi. Ona o le niiii la o ia tosi, o lea e i ai a si faigata ua le mafai ona faatino i naifi foi ia, vaeatu le mamalu o le Maota lea e masani ona tosi ai laufala, a o lo o faaaogaina ai nila e tosi ai le tosi tasi, faapena foi ma le tosi lua. Ma o le taimi lenei, ua tusa ma le 2,129 tosi tasi ma tosi lua ua uma ona faalele, aua e pei ona silafia o tausaga uma e fai ai le faalelegapepe, a o le aofai la lena i le matau a le Matagaluega e 1,994 tosi tasi, ae 225 tosi lua, o le aofaiga ua 2,129 tosi tasi ma tosi lua lea ua i ai nei i totonu o le tatou atunuu, a o lea e seasea tatou vaaia se tosi tasi o agiga i ni faalavelave o fai nei, na o ie lapopoa a lea ua tatou taumafai e uunai ese foi lele ae suia i le ie Samoa. Atonu a e oo atu loa i le 5,000 ni ie Samoa ua uma ona lalaga, ona talitonu lea o le a amata ona aliae mai ie ia i o tatou faalavelave o lo o faagaso lo nei.

A o le tulaga la lea e i ai le tatou ie Samoa, e leai lava se eseesega ma le vaega lea sa ou faalogo atu i ai o taua ai le aoga o tupe alu i lakapi, leaga o lea foi ua tele ina gugulu foi se tasi vaega o le atunuu faapea i le seleni leae ave e uunaia ai tina mo le lalagaina o le ie Samoa. Mo le silafia, e tele foi le earning lea ua maua mai ie Samoa ona o le galuega lea a tina o lea e sau i totonu o le atunuu, e leai lava se eseesega ma le seleni lea e alu e ao ai tama lakapi, o i fafo maua mai tupe ma aumai i totonu. E faapena foi le aoga o le ie Samoa, o tupe e alu, e pei a ona saunoa lou uso a Minisita i lou itu taumatau, o tupe e alu e sue ai isi tupe. O le aoga la lena o lea foi taumafaiga a lo tatou atunuu o lo o faaaogaina ai tatou ie Samoa.

Lau Afioga i le Fofoga Fetalai, ona pau lea o se vaega o lea sa fia oo i ai ma asiiasi i ai le avanoa ua tuuina mai e faaaoga ai lou taimi ona e leai ni mataupu tele sa laga mo lau Matagaluega.

FOFOGA FETALAI: Ia se i tulai mai le Palemia.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetatalai, e i ai falemai o le vaega foi lea o Taulasea Samoa lea e tu i tafatata o le faletele o le Malo, e i lalo la o le vaaiga a le Afioga i le Minisita mo Tagata Tafafao Maimoa Mai Fafo.

E i ai la le nuu lena, le atufalega lena e faaigoa o le STA Village, o le nuu faataitai foi lele e tau atu ai i tagata asiasi maimoa mai fafo, o le faataotoga lea o nuu i tua, ma e fai ai i mo le faailoaina o mea ia o taga tatau. E i ai la le falemai o taulasea e i ai i ina, e masani a la ona ou alu ane ou talatalanoa i ai i nai olomatutua, e i ai i latou e fofoina gau, e i ai i latou e fofoina mai mageso, e i ai i latou e fofoina mai oso ma ituaiga mai eseese. A fail mai la uta i le falemai ae mafai ona tagofia e olomatutua ia gasegase e le mafai ona togafitia e fomai. O le molimau la lea ou te maua, o isi a tagata o le tatou atunu u lavevea i le mai lea o le gaugau, ae mafua le gaugau o le mamafa o ietoga ia e tasisi i luga ua maualalalo ai ulu o isi nuu, tasisi la i mea o lou foi nei toliulu.

O lea la ou te fia fesili atu i lau Afioga i le Minisita, o le a la le taumafaiga a lau Matagaluega e tuu ai mea o ie tetele ia e faagau tauau o taulelea o nuu, ae faaaoga loa ie tosi tasi, ua siitia ai le maualuga ma le aloaia se i taumafai e faaaoga le tiga o nei tina, lea ua oo i nila, ou te le iloa po o nila o tuiga toto, po o nila suisui nei e faaaoga. Pe mafai ona aumai sau faapupulaga i le mataupu lea po o afea, a o le a foi le auala o le a faaaoga ai ie lea ua ou faalogo atu seiloga e oo i le 5,000 po o le 10,000, ona faatoa mafai lea ona aumai ie ia i fafo, aua o lona uiga o lea a e tanumai i lalo o le moega, aua o isi ie ia ua alu i Toga, ua alu i fafo. O isi ie ia e faatau e mea o turisi e omai i Samoa ona o le fiafia e tilotilo i measina a Samoa. Pe mafai lava ona maua sina faapupulaga?

FOFOGA FETALAI: Malie le Minisita, masalo na ona faamanatu atu ona ta te itumalo faatasi, o lena e te silafia ua amata i ou faalavelave foi nei sa fai talu ai nei, ae na o faifeau lava e tofa ai i ie na ini tasi, ini lua, ae le o faalauaiteleina na o faifeau lava e tofa ai. O la e ua faaaoga ia taua i tua.

Ia se i tulai mai lau Afioga i le Minisita.

Afioga Hon TUITAMA TALALEI TUITAMA: Lau Afioga, o le fofo a lea ou te manao atu i ai, aua le toe lalagaina lea ituaiga ie tetele faapea, ua lava ia ie lapopoa ua i ai, aua o lea e tasisi i mea o lou, e alu alu a masaesae, aua e tetele tosi pei o le falalilii nisi o ie, a ia uunai atili le lalagaina o le ie Samoa ina ia tele ma faatupulaia le numera, ona le toe tilotilo lea o se isi i ie tetele ia, ae agai tasi a le tatou atunu i ie ia Samoa. Aua a tele foi ie ua amata foi lea ona taugofie. O le taimi nei, e seasea maua se ie i lalo ifo o le 5,000 o ie Samoa ia, ie ia tosi tasi ona o le faigata. Tusa e ono masina i le tausaga e lalaga ai se ie se tasi, a o lea pei ona maua foi i saunoaga a nisi o sui usufono i le taimi ua fano, o le faalelegapepe lea na fai nei, e tasi mai Upolu i le itumalo lea o matou i Aana, 11 tausaga na lalagaina le tosi tasi, ma le 15 tausaga mai Salafai, o tupulaga talavou lea o lea ua agai e ao le lalagaina o le ie Samoa.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Ma e fautuaina pea afioaga ma alaalafaga ina ia uunaia pea lea matafai, o se tamaoaiga e sili e le gata e tamaoaiga ai le tatou aganuu, ae tamaoaiga ai foi le faatupulaia o seleni e tua i ai aiga mo faalavelave fai.

Lau Afioga i le Fofoga Fetalai, e fia momoli atu lau faafetai i Sui o Nuu ma Sui o Tina i nuu i tua i lo outou amanaia o se faatalauula atu i le tatou fonotaga talu ai, o lea ua matauina le matagofie o le teuteuina o aai taitasi, e le gata i le sau mai le malae vaalele e tau mai i Apia nei, ae ua faapena foi i afioaga i nuu i tua, ae faapena foi i afioaga i le motu i Salafai, faamalo faafetai tapena mo le tatou taligamalo. Ae pei lava ona tatou talanoa ai ma tatou fetuunai, e auliuli sau se taimi tatou feiloi e molimoli atu se faamalo ma se faafetai e tusa ai ma lo outou amanaia o le faamoemoe o le tatou Malo mo le faamatagofieina o tatou aai.

Ae faaopoopo atu ai, aua na o le matagofie e vaaia, a o le matagofie foi i le faatinoina o le tu ma le aganuu a Samoa i lona faaaloalo ma le ava i a tatou Malo pe a faagaso mai atunu, aua o le tala lea, pei lava ona avatu i le tatou mafutaga, e seasea maua se avanoa faapenei e omai ai ni tagata se toatele o tagata mai totolu o nuu i tua o Malo nei e oo atu i ai le faamatalaga lea. O le tele o tatou Malo lea e omai faa-turisi, na o e e maumea e nonofo i aai, o e maualuluga i tofi, e le mafai ona fesootai ma le tele o le atunu, a o latou nei o le a gasolo mai, o e omai mai nuu i tua, o e omai mai aiga i totolu o nuu taitasi o atunu ia, o le a o atu ma avatu i ai le tala, e tele lava le aoga o le tatou taumafaiga lenei mo le faalauiloa atu o tatou tu ma aga ma le tatou aganuu faaaloalo ma le ava i a tatou Malo.

Ia o le toe faamanatu atu lea ma le agaga faaaloalo, e le aoaia e Laupua Tamafaiga, a o se tuualalo e molimoli atu o lea ua maua le avanoa, ia manuia tele le alo atu mo le tatou taligamalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai, ia ona o le matafai o le matafai a le Minisita, o lea ua talanoa mai i le lalagaina o le ietoga i le tai 11 tausaga. Ia ae lava ou te tau maua, e i ai foi ia isi toeaiina ua lalaga ietoga. Pe le mafai ona... po o i ai sau fuafuaga foi lea e fai foi se falelalaga o toeaiina latou. Aua le o ifo fua toeaiina e laga fala ma olomatutua. Ae pe mafai ona fai pea se a latou falelalaga, aua a tuufaatasi e maua atu ua laga fala mai le isi toeaina ma le olomatua a le isi toeaina. Ae pei ua oo sou finagalo i ai i lea mea e fai pea se falelalaga o tama latou. E aoga mo mea, aemaise lava ia afioaga foi ia e o ifo nofonofo i tamai fale i auala o lea na o le ita ita ai lava o le Afioga ia Sala, ia ma faalavelave fua i tagata feoai mo turisi. Ae a fai lava se a latou falelalaga, ia e ono faaaoga tatau ai... e le o nuu uma. Ua oo i ai ia sou finagalo i lena mea?

Afioga Hon TUITAMA TALALELEI TUITAMA: Lau Afioga i le Taitai o le Malo, o lea ua faagaso fuafuaga a le tatou Matagaluega, ona ua matauina ua agai tina e lalaga ia le ie Samoa, ae ua agai ia tama, e fai ia le faletalatala. O le tele o faamatalaga ia ua salalau mai nei, ua ui mai i tama.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

O lea la ua i ai le fuafuaga a le tatou Matagaluega, o le a fai foi ia le falelalaga a tama ia. E i ai foi faailoga faapitoa, mo le tama e lelei lana lalaga, ia ae pe i o le manaia lava o falelalaga i totonusi o aiga fealofani, ia lalaga mai le olomatua i le isi pito ae lalaga mai le toeaina i le isi pito, ia fetau i lava i le ogatotonu ina ua uma ia le ietoga. O le faaaliga lea ma le agaga faaaloalo, manuia le Fono lau Afioga.

FOFOGA FETALAI: Malo, faafetai, ia e pule lava le tama a le olomatua ia, faafetai mo le saunoaga. Ia lea ua maua le avanoa e tapa ma le faaaloalo lau Afioga i le Minisita o Atinae a le Malo, Pisinisi ma Alamanuia.

Afioga Hon LAUTAFI FIO SELAFI PURCELL (Minisita mo Pisinisi Alamanuia ma Leipa): Ia faafetai atu i lau Afioga, sa ou tau talosaga atu lava pe o lea ua oo i le tatou taimi o le malologa? Ia ae pule lava lau Afioga, e faaafaafa le lauga a Satupaitea, pe tuu ia se i amata lelei pe a tatou... ia ae tuu atu pea i lau Afioga.

FOFOGA FETALAI: Ia, ona e manatu lava i nai minute e faaaoga pea ia le tatou taimi, o lea ua toe kuata i le 1, ae mafai ona tatou manava i le toe 5 i le 1.

Afioga Hon LAUTAFI FIO SELAFI PURCELL: Ia faafetai i lau Afioga, e 5 foi lava minute uma, ae faafetai tele, faafetai. O lea e musumusu mai si ou uso a Minisita, o la e ave lava na o faifeau ia ie a lau uso a Minisita lea ma te itumalo faatasii, ia ae le manatua mai ia. Ia a toe fai nisi ou faalavelave ia manatua lou uso a Minisita.

Lau Afioga i le Fofoga Fetalai, e muamua ona ou faatulou i le pau o le Maota, i le Fonousu a Samoa, i le Afio o lau Afioga i le Fofoga Fetalai, afio o lau Afioga i le Palemia, mamalu o le Kapaneta, tainane foi le mamalu o Taitaifono o Komiti Faapalemene, tainane le mamalu o sui usufono o le Maota nei, faapea le mamalu o le itu nei i le afifio atu o Minisita Lagolago, mamalu o i latou o lo o tua, lima ma vae i ai lo tatou Malo, i Ofisa Sili o Pulega o Matagaluega, le Ofisa o le Fono, ia ma le mamalu o sasao nei. Faatalofa atu i le faafogafogaaga a Samoa, le tapuaiga a Samoa mai lava i mauga tetele seia paia mauga iti, auauna a le Atua o lo o faafalelemau i itu e fia o le tatou atunu. Ia, faatalofa atu foi i si ou itumalo Satupaitea, faamalo le tapuai mai, le Vaiti ma le Vaimalae, Susu o le Aiga Sa Moeleoi, Afifio o Tapaua, tainane le Mamalu ia te Oe le Alataua, afifio foi o faletua ma taus, aemaise ia i latou o tauasuina le ipuvai o le ola i totonusi o le tatou itumalo. Faamalo i la outou tapuai mai ma la outou tatalo.

Faatalofa atu i le mamalu o Samoa lea ua maua ua faafogafoga mai i atunu mamao, talu ai ia tekonomosi faaonaponei, e fou lenei mea. O lea e fesootai mai au uo ma e masani mai fafo e pei ona saunoa le Minisita, po o fea lava o le lalolagi la e i ai, o lea e faalogologo mai i le tatou Fono.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E momoli atu ai le faafetai, tou te alaala lava i fafo a o lo o outou naunau mai ia outou faalogologo ma outou faafogfa mai, i mea o lo o talanoa ai le Fonousu a Samoa, aua e lele lava le toloa, ae maau mai lava i le vaivai. Faatalofa atu ia te outou uma.

Lau Afioga i le Fofoga Fetalai, e i ai nai mataupu sa afea ai le Matagaluega o lo o ou vaiaia. O lagona foi o nisi o mataupu sa laga, ia o mataupu lava e ono lelei atu pe ana faapea e soalaupule mataupu sa laga o mataupu lava e ono lelei atu pe ana faapea e soalaupule ma faamalamalama atili i Matagaluega po o lou ofisa foi, saausi lelei le mataupu ona malamalamama atili lea. Ae ui i lea, ona ua oo mai i le Maota nei, o le a ou taumafai e tali atu pea. Ae a le malamalamama pe manaomia pea nisi faamatalaga, e pei lava o lau tala e fai atu soo, e matala lava lou ofisa. O Matagaluega uma lava lea e i lalo o lau vaavaaiga, ua uma ona ave i ai le faatonuga. A i ai se sui usufono e fia manaomia se avanoa i le Pule Sili ia faaavanoa le taimi mo outou. Leaga o taitai ia o lo tatou Malo, lea e sue atu ni avanoa, ia nofo uta la i ai le Maota nei. Afai ae e oo atu i se Pule Sili o se Matagaluega ae faapea mai e leai se avanoa po o la e fono, ona e afio atu lea ta te talanoa, e vave lava ona maua lou avanoa i Matagaluega uma ia. Ua malamalamama foi nai au Matagaluega i mea e faataua ma mea e tatau ona ave i ai le faamuamua.

Lau Afioga i le Fofoga Fetalai, o le a avatu se faamatalaga lautele, aotelega foi lea i mataupu sa tuuina mai. Sa talanoaina mai e nisi o sui usufono, le tatou minimum wage po o le totogi laititi lea foi ua pisapisao ai foi le toatele o nisi tagata, fai mai ua tatau ona sii i luga. Ua leva foi ona tilotilo i ai le Malo, e le o le Fonotaga muamua foi lenei sa laga ai le mataupu lea, ma ua leva ona tapenapena i ai lo tatou Malo, i tulaga lea o le toe iloilo o le minimum wage o lo i ai nei e \$2.30. O le masina fou ia Iulai, e amata ai galuega a le konesale mai fafo lea ua aumai e na te review ina le tatou minimum wage. O le mea foi lenei o le minimum wage e tele lava ona felefele sei tulou, mea e tatau ona tilotilo i ai ina ia maua se taunuuga lelei. Aua e pei o tagata e ona falefaigaluega, e pei o i latou ia o lea o le aafia tele i le mea lenei, pe a sii totogi. E tilotilo foi pe maua ni tupe maua a latou e totogi ai tagata faigaluega i le siitaga pe afai ae siitia. Ae po o le lua i le tolu masina, ona maua mai lea o se lipoti a le Konesale lea, ona avatu foi lea i le Kapaneta ma fai i ai fuafuaga ona oo mai foi lea i totonu o le Maota nei, o le tulaga lena. O i ai finagalo e faapea o oloa, e faale lelei le quality o oloa, o isi mea o....

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Tulai mai le Palemia faamolemole.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

Susuga Hon Tuilaepa Auelua Fatialofa Luplesoliai Lolofietele Neioti Aiono GalumalemanDr. Sailele Malielegaoi: E faamalie atu i le Afiofa i le Minisita, masalo o le matapu lenei o totogi faatapulaaina pito maualalo o tagata faigaluega, e masani ona i ai si faalemanino. Ona o i tonu lava e agai tonu lava i le aufaigaluega po o tagata faigaluega le tumau. Ae le aafia ai tagata faigaluega tumau. O lona uiga o i latou e le tumau, o tagata foi ia e faaigoa o tagata totogi aso. E mafai lava ona faamuta i so o se taimi. Faamuta i le aso, faamuta i lea vaiaso. O i ina tonu la lea e agai tonu i ai le mea lea e le o tagata faigaluega. O tagata faigaluega tumau lava latou, o la lava e taoto faavae o latou totogi. A o tagata tonu lava, le au labour lea e masani ona manaomia e si toeaina e avatu e toto ana tiapula, o le tulaga lena, po o le tagata e alu atu e sasa le vao po o le tagata faapea e totogi aso. Ina ia mamino lautele ai e le atunu o lo o faafogafoga, e le aofia ai le aufaigaluega e galulue tumau, o i latou na o lea e taoto lelei ia aiaiga o latou totogi, lea e faatulaga e le tatou komiti foi lea e faatulagaina le tulaga o totogi i le aoaoetetele, e le gata i le Malo ae faapea foi ma Faalapotopotoga tumaoti a lo tatou Malo. O le mea sili o lea e faafogafoga mai ia Faalapotopotoga tumaoti, e le faapea e le aofia ai outou, e aofia uma lava ma outou, vaega ia tumaoti.

O le mea la e faaeteete i ai le Malo, e faatulaga loa totogi ia, aafia uma lava le aufaipisinisi. Ona o le Malo e faatulagaina totogi, e taua le itu lea, ona e i ai le fesili na aumai ia te au i le tulaga lea o le faatalanoaina o mea faapenei. Pe ou te lagolagoina pe ou te le lagolagoina, a le lagolagoina o le Malo lea e faatulaga atua. E faatulaga atu ia totogi o le aufaigaluega tumau, toe faatulaga atu ma totogi o i latou o labour.

O lea la, o le matapu tonu lava lena e fitoitonu ma le Matagaluega lea e saunoa i ai le Minisita. O i latou na latou te vaavaaia mea ia, ma e oo mai loa i vaega ia le tumau, e matua faaopoopoina le faaeteete. Aisea? Leaga e fulisia le vaega lea o le au le tumau ia i latou e fai a latou pisinisi, a latou faatoaga, o le mea tonu lea o lea na tapuni ai le tele o togakoko ia na i ai, faatoaga tetele ia, ona ua laa le Malo i i mea ia, ia o faatasi ma mea tau labour i le lalolagi atoa. O lea la e le umi ae tapuni ia Pop crop, tapuni faatoaga tetele nei, ona ua faatulaga ua tatau ona sii totogi o a latou labour. E pito i aafia la le private sector i le mea lea, o le ala lena e le faatamala ai le Matagaluega. A o le toatele foi o i latou nei, aemaise lava o kamupani, ua tele lava ina maualuga maoae totogi o latou, maualuga maoae atu i le \$2.40 lea. Ae ala ona tau kolosi se laina e faalaugatasia ai tagata labour le tumau ona o le faaeteetega lea i le Matagaluega, ina ne i te i ua soona fai se mea e siitia i luga, ae vaai atu ua tapuni atu lea pisinisi tapuni ane lea faatoaga tapuni atu lea mea.

O le mea lea o lea na tupu nei i le Faleia lea na tapuni. Na oo i le tolu faleia i i Tutuila, o le a le mea na tupu. Ua faatulaga mai e le konekelesi a Amerika, le fonotele a Amerika, o le tulaga maualalo ia e oo i ai, ia aua nei lalo ifo ia totogi o au labour, o tagata galulue le tumau e aafia ai ma faleia.

24 IUNI 2019

Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe
2019/2020 – felafolafoaiga i luga o le faitauga faalua

E tai masina ma malaga le Kovana o Amerika Samoa i le taimi lena, e alu i o i le konekelesi lea po o le congress le Fono Aoao Faitulafono a Amerika e finau i faipule a Amerika o le a afaina ia teritori nei o Amerika pe a outou faatulaga le totogi maoae ia e oti ai ma faleia. E le i faalogo i ai le konekelesi. O le a le mea na i ai? E na ona tasii lava i luga tapuni loa ma faleia ia, pe lua faleia. E toe tasi lava la le faleia la e alu nei. O le mea la lena e tatau ai ona malamalamalama lelei le atunu i le mea lea, tatou te le o talanoa i totogi o i latou o lo o galulue tumau, o lea tatou te talanoa i totogi o le au labour.

FOFOGA FETALAI: Malo faafetai, ou te manatu ua manino le vainiu lea e pei ona malele ma saunoa i ai le Afioga i le Palemia, e pei ona faaiila mai e le Afioga i le Minisita. Ae o lea ua tulai atu le Palemia, o lea ua manino, e le gata i le manino i le faafogfa a le Palestina a o le faafogfa tapuai mai a le atunu. Ina ia faapena ona galulue faatasi, fai fuafua foi e le Malo se faiga ina ia faapena ona tulai mai ai i latou o lo o faapena ona faipisinisi, faifaatoaga ina ia... a maua foi avanoa e maua ai tagata faigaluega e galulue ma faaauau ai galuega. O le mea la lea, malo faafetai saunoa i lau Afioga i le Palestina. Faamalulu atu i lau Afioga i le Minisita o le a faaauau lau saunoaga i le aso a taeao pe a pule alofa le Atua e aulia i le lagi e mama ma le soifua manuia.

Ona o lea ua tatou toai taunu i le tatou taimi manava, ae tatou te le i tolopo, ou te tapa lau Afioga i le Sui Fofoga Fetalai, e te faaiuina la tatou Fonotaga i se tatalo.

Na tolopo Taualumaga a le Fono Aoao Faitulafono i le itula e 1:05 i le aoauli seia aulia le itula e 9:00 i le taeao o le Aso Lua, 25 Iuni 2019.